

Kuyantika 1**Kuyantika 2****Yobi****Kuyantika 3****Kuyantika 4****Kuyantika 5****Kubasika-Levi****Kutanga-Kulonga****Yozue****Bazuzi-Ruti****1 Samuele, Bankunga****2 Samuele, 1 Bansangu****1 Bantotila (Kimfumu ya Kukabana)****2 Bantotila, 2 Bansangu****Kukabana na
Bimfumu Zole****Kimfumu
ya
Israele
(nord)****Kimfumu
ya Yuda
(sud)**

KIMFUMU YA YUDA-Bilumbu ya Nsuka

Ndambu mikanda ya 2 BANTOTILA ti 2 BANSANGU, YEZAYA ti YEREMIA, NAHUMI, SOFONIA, HABAKKUKI, MISHE, MAWA

**(Baleso 15)**

Le Projet MWINDA—Ministères pour Chaque Enfant
Merci à www.freebibleimages.com/SweetPublishing sambu na dessin.

www.ecodimafrique.com

ministerespourchaqueenfantrdc@gmail.com

Musoniki: Mama Lorella Rouster. MCE **Edition 2025**

KIMFUMU YA YUDA— Bilumbu ya Nsuka

[NB : Moniteur, baleso yai ke landa mukanda ya baleso ya Kimfumu ya Kukabana. Baleso 24 kele na mukanda yina. Yo yina, mukanda yai ke yantika na lesa 25.]

Baleso ti baverse ya kulonguka ya kele na mukanda yai :	Page
Leso 25 Mfumu Ezekiasi tulaka ngolo kusukula Nzo-Nzambi ti kuvutula bisambu. 2 Bansangu 29.....	2
Leso 26 Ezekiasi tulaka mpasi na yandi na ntuala ya Mfumu Nzambi. Yezaya 36-37.....	5
Leso 27 Profete Yezaya songaka na ntuala mutindu Yesu Mesia ta mona mpasi sambu na mbi na beto. Yezaya 53 :1-9.....	8
Leso 28 Lulendo bendaka Ezekiasi kusala mubulu. 2 Bantotila 20 :1-21.....	11
Leso 29 Manase salaka mbi na mpila nde Nzambi zengaka nde Kimfumu ya Yuda mpi ta bwa. 2 Bantotila 20:21, 21 :1-18, Nahumi 1 :2-3.....	14
Leso 30 Manase balulaka ntima na kimpika, kansi mwana na yandi landaka mbandu na yandi ya ntama. 2 Bansangu 33 :11-18, 2 Bantotila 21 :18-23.....	17
Leso 31 Yoziasi nataka reveil, yo yina ndola bwaka ve na bilumbu na yandi. 2 Bantotila 21:24, 22:1—23:30, 2 Bansangu 34 :1-19.....	20
Leso 32 Ndola yantikaka kubwa na bilumbu ya Yoakazi. 2 Bantotila 23 :30-34	23
Leso 33 Yoyakimi yokaka Mukanda ya Nzambi tiya. 2 Bansangu 36 :5-8, Yereimia 36	26
Leso 34 Nzambi nganinaka bo na munoko ya baprofete na Yandi, ti songaka Mesia ya fweti kwisa. Bitini ya Sofonia, Habakuki, Mishe	29
Leso 35 Nzambi landaka kupesa ndola na ntangu ya Yoyakini. 2 Bantotila 24 :6-16	32
Leso 36 Mfumu ya mbi Sedasiasi tulaka Yereimia na prison na dibulu ya potopoto, kansi muntu ya ndombe gulusaka yandi. Yereimia 37 & 38 :1-13	36
Leso 37 Ndola ya nsuka. Yeruzalemi panzanaka. 2 Bantotila 25	40
Leso 38 Profete Yereimia dilaka kubwa ya Yeruzalemi. Bitini ya Mukanda ya Mawa.....	44
Leso 39 Leso ya Revisio	47
Kulonga Mikanda ya Bible	49
Bankunga Beto Sadila na Mukanda Yai	51
Balinya ya Ntangu ya Baleso yai	53

Merci mingi na www.freebibleimages.com / Sweet Publishing /Lumo Project sambu na bafoto.

Baverse yonso ya Bible na mukanda yai kele ya Version Mwindi sambu na bana.

Leso 25. Mfumu Ezekiasi tulaka ngolo kusukula Nzo-Nzambi ti kuvutula bisambu.

Histoire yai ke monika na : 2 Bansangu 29

I. PREPARATION SAMBU NA MONITEUR-

🕒 Kikuma ya Leso :

Bana ta bakisa nde Nzambi ke lunga kubaka bisambu na beto. Yo yina, bo ta zola mingi kusamba Yandi.

♥ Verse ya Kulonguka :

Beno samba Mfumu Nzambi na kiese...Beno kota na nzo na Yandi.

Beno kumisa Yandi. Beno pesa Yandi mersi ti lukumu yonso ! Bankunga 100 :2a, 4

🗨️ Bankunga ya kwenda nzila mosi ti leso :

Beto Mene Kutana
Kumisa Nzambi

II. REVISIO

↑ Na baleso ya beto me mona dezia, banzenza me bedisa Kimfumu ya Israele na norde. Bantu ya Kimfumu ya Israele me kuma bampika. Bantu ya Kimfumu ya Yuda me mona nki Nzambi salaka na bampangi Israele sambu bo buyaka Yandi. Tii ntangu yina, ndambu ya bamfumu na bo na sude me tesa kulanda Nzambi, kansi mingi ve. Keti bamfumu ya Yuda ta landa na nzila ya mbi mpi, to bo ta landa Nzambi? Baleso yai ke tadila ntangu ya bo vandaka zenga kestio yina.

III. KULONGA LESO YAI

➔ **Kuyantika :** Sambu na nki bantu yonso zola ve kukwenda na nzo-Nzambi, kusamba Yandi ?
[Moniteur, bana lenda pesa bangindu na bo.]
Raison mosi lenda vanda nde bo zola Nzambi ve.
Yo yina, bo zola ve kusamba Yandi.

Na bilumbu na ntwala Ezekiasi kumaka mfumu, bamfumu mingi buyaka Nzambi. Bo bebisaka nzo-Nzambi. Bo katulaka bima ya vandaka na kati. Bo fulusaka yo na bima ya mvindu. Bo kangaka bisambu ya Nzambi sambu bantu kwenda kusamba

biteki. Bo salaka yai yonso, ata bo zabaka nde Nzambi gangaka zulu ti ntoto, ye pesaka bo mpi moyo.

🏠 Malongi ya nene ya leso yai (developpement) na banti ya malongi 4 :

25.1 Mfumu Ezekiasi zolaka kuvutuka na Nzambi ti kuvutula bisambu na Nzo-Nzambi.

📖 **Tangila bana :** 2 Bansangu 29

1 Ezekiasi kumaka ntotila ntangu yandi me lungisa bamvula 25. Yandi yalaka bamvula 29 na Yeruzalemi. Ezekiasi salaka mambu ya pesaka Mfumu Nzambi kiese...

1 Na ngonda ya ntete ya kimfumu na yandi, Ezekiasi kangulaka diaka bakielo ya Nzo-Nzambi, ebuna yandi yidikaka yo.

4-9 Yandi bingaka banganga-Nzambi ti dikanda ya Levi. Yandi songaka bo nde : «...Bankaka na beto salaka mubulu na Mfumu Nzambi...Yo yina Mfumu Nzambi wilaka Yuda ti Yeruzalemi makasi...

10 Kansi mono ke zola kuwakana na Mfumu Nzambi...na mpila nde Yandi katula makasi ya Yandi me wila beto.

? Yula bana bakestio.

🏠 Bana sala bageste.

🗨️ Bana yimba ti kina.

25.2 Bantu ya Levi salaka ngolo. Bo sukulaka Nzo-Nzambi na bilumbu 9.

📖 **Tangila bana :** 2 Bansangu 29 :16
16 Banganga-Nzambi kotaka na kati ya Nzo-Nzambi. Bo basisaka bima yonso yina vandaka mbi. Bo nataka yo na nganda ya bwala. Bo losaka yo na dibeni...

Bo salaka bilumbu nana sambu na kumanisa kisalu yonso ya kuyidika Nzo-Nzambi.

? Yula bana bakestio.

🏠 Bana sala bageste.

🗨️ Bana yimba ti kina.

25.3 Na nima, Mfumu Ezekiasi kwendaka nswalu na Nzo-Nzambi sambu na kupesa bamakabu ya menga.

📖 **Tangila bana :** 2 Bansangu 29 :19-24

19-24 Na kilumbu landaka na suka-suka,
Ezekiasi bingaka bambuta yonso. Bo
kwendaka ti yandi na Nzo-Nzambi. Bo nataka
bangombe 7...mameme 7...bana-mameme 7, ti
bankombo 7 sambu na kupesa makabu na
Mfumu Nzambi sambu Yandi lolula bo, Yandi
ndima diaka nzo na Yandi.

? Yula bana bakestio.

🏠 Bana sala bageste.

👤 Bana yimba ti kina.

25.4 Bantu mingi kwendaka na Nzo-Nzambi. Bo sambaka Yandi na misiki ti na kiese.

📖 Tangila bana : 2 Bansangu 29 :25-36

25-36 ...Ezekiasi tulaka bantu ya Levi na kati ya
Nzo-Nzambi ti bagitare ti basimbale na bo,
bima ya miziki, banganga mpi ti bampungu na
bo...

Ntangu banganga vandaka kupesa makabu,
bantu yantikaka kuyimba bankunga na kupesa
lukumu na Mfumu Nzambi...

Ntotila Ezekiasi ti bantu yonso fukamaka ilungi
na ntoto kusamba Nzambi. Bo yimbaka na
kiese yonso...

Bo yonso vandaka kiese mpenza sambu
Nzambi sadisaka bo kusala kisalu yina yonso.

31 :21 Na bisalu yonso ya yandi salaka sambu
na kubongisa Nzo-Nzambi... yandi vandaka
kudipesa mpenza na Nzambi. Yo yina Mfumu
Nzambi salaka na mpila nde mambu na yandi
yonso kubonga.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mfumu Ezekiasi zolaka na ntima yonso kusosa
Nzambi ti kuvutula bantu na Yandi. Mambu ya
ntete yandi salaka vandaka kusonga fami ya Levi
kusukula Nzo-Nzambi. Na nima, yandi ti bantu
mingi sambaka kuna na kiese yonso. Bonso yandi,
beto ya zola landa Yesu Kristo, beto zola mingi Nzo-

Nzambi. Beto zola mingi kusamba Nzambi ti
kupesa Yandi lukumu.



Devoir sambu na bakristo :

Kana nge kele mukristo, mono ke lomba nge na
mposi yai kusamba Yandi na kiese, nge mosi ti na
kimvuka ti bakristo ya nkaka na nzo na Yandi.



Verse ya Kulonguka :

Bana tuba verse fraze na fraze na nima ya nge,
moniteur. Na nima, nge yantika fraze mosi, ebuna
bana manisa yo. Sala mpidina mbala iya. Na
nsuka, bana yo telama ti tuba verse ya mvimba.



Bankunga ya kwenda nzila mosi ti leso :

Twadisa bana kuyimba nkunga mosi ya ke kwenda
nzila mosi ti leso yai.



Invitation sambu na bo ya me yamba Yesu ntete ve :

Kana nge zola ve Nzo-Nzambi, kana nge zola ve
kusamba, mbote nge yindula mbote. Ketu ya
kieleka Yesu me changer ntima na nge ? Ketu ya
kieleka nge me balula ntima ? Nki Mpeve ya
Nzambi kele kusonga nge ? Nzambi yina salaka
zulu ti ntoto, Yandi kele na Mwana mosi, Yesu
Kristo, yina me zinga ti Yandi mvu ya mvu.

Yandi Kristo kotaka nsi-ntoto yai. Yandi fwaka na
zulu ya kulunsi, sambu na kubaka ndola ya masumu
yonso ya nge. Yandi ke na ngolo na zulu ya lufwa.
Yandi telamaka ti Yandi ke na moyo bubuyai.


Kana nge balula ntima na Yesu, ntima na nge lenda
bikala ve kiteso mosi. Kana Yandi me kota, nge ta
zola bima na Yandi—bisambu, ndinga na Yandi.
Ketu nge zaba nde nge me balula ntima ? Konso
mposi, beto kele awa na nima ya ecodim sambu na
kusadisa ti kusamba ti konso muntu ya zola balula
ntima. Kwisu solula kana Mpeve ya Nzambi ke bula
na ntima na nge.

===NSUKA YA LESO 25



Kana ntangu lunga, longuka mikanda ya Bible.
Bangindu na p. 49.

Leso 25



Mfumu
Ezekiasi
twadisaka
bantu kukota
Nzo-Nzambi
ti kubula
misiki na
kiese yonso.

***Beno samba Mfumu Nzambi na
kiese...***

***Beno kota na nzo na Yandi.
Beno kumisa Yandi.***

***Beno pesa Yandi mersi ti
lukumu yonso !***

Bankunga 100 :2a, 4

Leso 26. Ezekiasi tulaka mpasi na yandi na ntwala ya Mfumu Nzambi.

Histoire yai ke monika na : Yezaya 36-37.
(2 Rois 18-19 ti 2 Bansangu 32 :9-16 tuba yo mpi.)

I. PREPARATION SAMBU NA MONITEUR-

Kuyidika na ntwala : Sonika letter bonso
Senakeribi sonikaka na Ezekiasi.

🕒 Kikuma ya Leso :

Bana ta bakisa nde Nzambi ke na kiese nde beto
sosa Yandi. Yo yina, na bampasi ti bakestio yonso
ya luzingu, bo ta sosa Yandi ntete.

♥ Verse ya Kulonguka :

*14 Ntotila Ezekiasi bakaka mukanda yina. Yandi
tangaka yo. Ebuna, yandi kwendaka na nzo-
Nzambi ti tulaka yo na ntwala ya Mfumu Nzambi.
Yezaya 37 :14*

🔊 Bankunga ya kwenda nzila mosi ti lesa :

Lomba na Nzambi
Nzambi Ta Kuwa Nge

II. REVISIO

- ↑ Kimfumu ya Israele na nord me bwa. Yo
vandaka diaka ve. Kimfumu ya Yuda na sud
vandaka kuzinga. Mfumu Ezekiasi vandaka
kuyala ti kusosa Nzambi. Mambu ya ntete
yandi salaka, kusonga banganga-Nzambi bo
sukula Nzo-Nzambi, bantu yantika kusamba
diaka.

III. KULONGA LESO YAI

➔ Kuyantika :

Kana muntu ya ngolo songa nge nde, « Mono ta
fwa nge ti yoka nzo na nge tiya ! » nge ta sala nki ?
Keti nge ta wa boma ? Ketu nge ta lala mbote ?
Mambu bonso yo salamaka na Mfumu Ezekiasi.
Bubu beto ta mona nki yandi salaka.

🏠 Malongi ya nene ya lesa yai (developpement) na banti ya malongi 3 :

**26.1 Mfumu ya nene ya Asiria zina ya Senakeribi
kwisaka kunwanisa bantu ya Yuda. Yandi tindaka
muntu kupesa bo boma ya mambi yonso yandi**

**zolaka kusadila bo. Kansi Mfumu Ezekiasi waka
boma ve. Yandi ti Profete Yezaya sosaka Nzambi.**

📖 **Tangila bana :** Yezaya 36 & 36, bitini
*36 :1 Ntangu Ezekiasi me lungisa bamvula 14
na kimfumu, Senakeribi ntotila ya nene ya
Asiria kwisaka kunwanisa babwala na ntoto ya
Yuda...*

*13-15 Yandi nde : ... « Beno wa mambu ya
ntotila ya nene ya Asiria ke tuba ! ...'Mbote ve
Ezekiasi kukusa beno. Yandi ta kuka ve
kugulusa beno na maboko na mono...*

*18,20 Yandi ke kusa beno nde Mfumu Nzambi
ta gulusa beno. Ketu banzambi ya bantu ya
nkaka gulusaka bo na maboko na mono... ?
Ebuna nki ke songa beno nde Mfumu Nzambi
ta gulusa Yerusalemi ? »*

*37 :1 « Ntangu ntotila Ezekiasi waka mambu
yina, yandi ...kwendaka na nzo-Nzambi.*

*37 :2,4 Ezekiasi songaka bantu na yandi
kuzabisa profete Yezaya nde : Ntotila ya nene
ya Asiria me tinda mfumu na yandi ya basoda
kufinga Nzambi. Samba Mfumu Nzambi
sambu na beto. »*

*5-7 Ntangu Yezaya bakaka nsangu ya Ezekiasi,
yandi vutulaka nde : « Mfumu Nzambi ke
songa nge nde, 'Kuwa boma ve...yandi ta
vutuka ka yandi... »*

? Yula bana bakestio.

🏠 **Bana sala bageste.**

🔊 **Bana yimba ti kina.**

**26.2 Ezekiasi tulaka mukanda ya Senakeribi na
ntwala ya Nzambi na Nzo-Nzambi. Yandi lombaka
Nzambi kugulusa bo sambu bansi yonso zaba
kinene ya Nzambi.** [Moniteur, songa lettre ya mbi nge
me yidika ti mpila Ezekiasi salaka ti yo. Na nima, bana lenda
sadila yo na mwa-seneti na bo.]

📖 **Tangila bana :** Yezaya 37, bitini

*37 :9 ...Senakeribi...tindaka mukanda na
Ezekiasi...nde : « Nzambi na nge, ya nge ke
tulaka ntimu, Yandi me kusa nge nde
Yerusalemi ta kuma ve na maboko na
mono... »*

14 Ntotila Ezekiasi bakaka mukanda yina...yandi tangaka yo. Ebuna yandi kwendaka na nzo-Nzambi ti mukanda yango. Yandi tulaka yo na ntwala ya Mfumu Nzambi.

15-16 Yandi sambaka Nzambi nde : « Mfumu Nzambi, Nge kaka kele Nzambi. Nge ke yalaka bimfumu yonso ya nsi ntoto,,

20 Ntangu yai, Mfumu Nzambi, gulusa beto na maboko ya bantu ya Asiria. Mpidina bantu ya bansi yonso ta zaba nde, ya kieleka, Nge kaka...kele Mfumu. »

? Yula bana bakestio.

🏠 Bana sala bageste.

👑 Bana yimba ti kina.

26.3 Nzambi tindaka wanzio kuwanisa basoda ya Asiria ti kufwa bo na mpimpa. Bu Senakeribi monaka yo, yandi waka boma ti vutukaka na Asiria na nsoni.

📖 Tangila bana : Yezaya 37 :36-38

36 Wanzio ya Mfumu Nzambi kwendaka na camp ya basoda ya Asiria. Yandi fwaka basoda. Na suka-suka, bo kwisaka kukuta basoda yina yonso bamvumbi.

37 Ebuna Senakeribi ntotila ya nene ya Asiria katukaka, yandi vutukaka na bwala na yandi.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Ezekiasi bakisaka nde Nzambi zola beto kusosa Yandi. Ntangu yonso yandi sosaka Nzambi, ti yandi salaka yo mpi na ntangu ya mpasi. Yo yina, Nzambi waka ti sadisaka yandi na maboko ya mfumu ya nene ti ya ngolo.



Devoir sambu na bakristo :

Bana bakristo, mbote beno sosa Nzambi na konso mambu ya mpasi na luzingu na beno, ti ntangu yonso.



Verse ya Kulonguka :

Bana tuba verse fraze na fraze na nima ya nge, moniteur. Na nima, bo tuba yo mbala 3 ti bageste. Na nsuka, bankento tuba yo na ndinga ya zulu ti babakala tuba yo na ndinga na nsi, mbala 2.



Bankunga ya kwenda nzila mosi ti leso :

Lomba na Nzambi

Nzambi Ta Kuwa Nge



Invitation sambu na bo ya me yamba Yesu ntete ve :

Ezekiasi sambaka nde bantu yonso bakisa nde Nzambi kaka kele Mfumu. Bamvula mingi na nima, Nzambi tindaka Mwana na Yandi Yesu Kristo na ntoto yai. Beto binga Yandi Mfumu Yesu sambu Yandi kele Mwana ya Nzambi.

Yesu fwaka sambu na kupesa nge moyo ya mvula na mvula, sambu na kumanisa mfuka ya masumu ya nge ti Nzambi. Beto zaba nde Yandi kele kieleka sambu Yandi telamaka na lufwa. Kana Mpeve ya Nzambi ke songa nge nde nge kele na mfunu na Yandi, kubuya ve. Kukungira ve. Balula ntima na nge bubuyai sambu Yesu kota na luzingu na nge. Keti nge zola kuyantika kulanda Yandi bubuyai ? Konso mposi, na nima ya ecodim, beto ke kinga sambu na kusamba ti nge.

NSUKA YA LESO 26



Kana ntangu lunga, longuka mikanda ya Bible. Bangindu na p. 49.



14 Ntotila Ezekiasi bakaka mukanda yina...yandi tangaka yo. Ebuna yandi kwendaka na nzo-Nzambi ti mukanda yango. Yandi tulaka yo na ntwala ya Mfumu Nzambi. Yezaya 37 :14

Leso 27. Profete Yezaya songaka na ntwala mutindu Yesu Mesia ta mona mpasi sambu na mbi na beto.

Leso yai ke monika na Yezaya 53 :1-9

🕒 Kikuma ya Leso :

Bana ta tula ntima na Yesu Mesia, sambu bo ta bakisa nde, bamvula mingi na ntwala, baprofete ya Nzambi bonso Yezaya songaka nde Mesia fweti kwisa, ti Yesu lungisaka yonso ya bo tubaka.

♥ Verse ya Kulonguka :

Beto yonso, beto vandaka kuyungana bonso mameme, konso muntu na nzila na yandi. Ebuna Mfumu Nzambi tulaka mbi na beto yonso na zulu na Yandi (Yesu Mesia). Yezaya 53 :6

🔊 Bankunga ya kwenda nzila mosi ti leso :

Yezaya 53 :6

Mazono, Bubu, Mvu ya Mvu

II. REVISIO

↑ Kuyindula diaka baleso me luta :

Beto me nde Yezaya tubaka ndinga ya Nzambi na Mfumu Ezekiasi, zina na yandi Yezaya. Disongidila ya zina Yezaya, “Nzambi Ta Gulusa.”

III. KULONGA LESO YAI

➔ Kuyantika :

Bana, ntangu mono ke longa, konso mbala ya mono tuba zina ya profete Yezaya, beno yonso tuba na kimvuka nde, ‘Yandi songaka nde, Mesia ta kwisa.’ [Moniteur, sala pratike na yo ndambu, sambu bana bakisa. Nge tuba Yezaya, ti songa bana diboko. Bo yonso tuba na kimvuka nde, ‘Yandi songaka nde, Mesia ta kwisa.’]

Yezaya [Bana : Yandi songaka nde Mesia ta kwisa] sonikaka mambu mingi ya Nzambi songaka yandi. Yandi songaka mpila Nzambi ta sambisa Yuda ti bansi ya nka, mpila Yandi ta vutula bo na nsi na bo, mpila Yandi ta tinda Mesia na ntangu ke kwisa. Baprofete ya nkaka me songa dezia mambu mingi sambu na Mesia, kansi Yezaya [Bana : Yandi songaka nde Mesia ta kwisa] tubaka pwelele sambu na Yandi. Malongi ya Yezaya me kota na kati ya Bible na beto na mukanda na zina na

yandi—mukanda ya Yezaya [Bana : Yandi songaka nde Mesia ta kwisa]. Yezaya [Bana : Yandi songaka nde Mesia ta kwisa] zingaka kiteso ya bamvula 600 na ntwala ya Yesu. Yandi sonikaka mambu ya Mesia bonso yo me luta dezia, ata Yesu me kwisa ntete ve. Na meso ya Nzambi, Yandi ke mona mambu ya ta kwisa bonso yo me salama dezia. Tala ndambu ya mambu ya Nzambi songaka Yezaya [Bana : Yandi songaka nde Mesia ta kwisa] sambu na Mesia :

🏠 Malongi ya nene ya leso yai (developpement) na banti ya malongi 4 :

27.1 Yezaya [Bana : Yandi songaka nde Mesia ta kwisa] songaka nde bantu ta saula ti bo ta buya Mesia ya fweti kwisa.

📖 Tangila bana profesi : Yezaya 53 :3

Bantu vandaka kusaula Yandi ti kubuya Yandi. Yandi vandaka kumona mpasi mingi...

Beto vandaka kubalula ilungi sambu beto mona Yandi ve.

Beto vandaka kuvwenza Yandi bonso kima ya mpamba.

? Yula bana bakestio.

🏠 Bana sala bageste.

🔊 Bana yimba ti kina.

📖 Kuwa mutindu Yesu lungisaka profesi yai ntangu Yandi vandaka na zulu ya kulunsi :

Matayo 27 : 39,31 ...Bo vandaka kunikisa ntu na bo ti kusaula Yandi... Bo vandaka kuseka Yandi mpi...

27.2 Yezaya [Bana : Yandi songaka nde Mesia ta kwisa] sonikaka nde Mesia ta baka kilo ya mbi na beto na zulu na Yandi mosi.

📖 Tangila bana profesi : Yezaya 53 :4-6

4 Kisi ve, Yandi nataka kilo ya bampasi ya beto zolaka kunata...

Kansi beto, beto vandaka kubaka Yandi bonso muntu ke na ndola, bonso muntu yina ya Nzambi me bula, ya Nzambi me pesa nsoni.

5 Kansi Yandi lwalaka sambu na masumu na beto. Yandi monaka mpasi sambu na mbi na

beto. Ndola ya bwilaka Yandi, yo ke natila beto ngemba....

6 Beto yonso, beto vandaka kuyungana bonso mameme, konso muntu na nzila na yandi. Ebuna Mfumu Nzambi tulaka mbi na beto yonso na zulu ya ntu na Yandi.

 **Nkunga ya kwenda nzila mosi ti leso :**

 Yezaya 53 :6

 **Kuwa mutindu Yesu lungisaka profesi yai :**

Roma 5 :6 Sambu ntangu beto vandaka me baka ngolo ntete ve, Kristo fwaka sambu na beto bantu ya mbi...

27.3 Yezaya [Bana : Yandi songaka nde Mesia ta kwisa] songaka nde Mesia ta vanda pima, ti Yandi ta ndima mpasi ya bantu ta pesa Yandi.

 **Tangila bana profesi : 53 :7**

7 Bo monisaka Yandi mpasi mingi, kansi Yandi ndimaka yo kaka.
Yandi tubaka kima ve...

 **Kuwa mutindu Yesu lungisaka profesi yai :**

Matayo 26 :62-63a Mfumu ya banganga-Nzambi yulaka Yesu nde : “Keti nge ke vutula ata kima ve ? Sambu na nki bantu yai ke funda Nge ? Kansi Yesu vandaka kaka pima.

? Yula bana bakestio.

 **Bana sala bageste.**

 **Bana yimba ti kina.**

27.4 Yezaya [Bana : Yandi songaka nde Mesia ta kwisa] songaka nde mpasi yai ta kwisila Mesia, ata Yandi ta sala ata mbi mosi ve.

 **Tangila bana profesi : 53 :9**

...Yandi salaka kima mosi ve ya mbi,
...Yandi tubaka ndinga mosi ve ya luvunu...

 **Kuwa nki mutindu Yesu lungisaka profesi yai :**

2 Korinto 5 :21 Kristo vandaka na masumu ve, kansi Nzambi pesaka Yandi kilo ya masumu na beto...sambu Nzambi kundima beto na kimvuka ti Kristo.

? Yula bana bakestio.

 **Bana sala bageste.**

 **Bana yimba ti kina.**

>|< Kumanisa Malongi :

Bamvula 600 na ntwala ya Yesu, Nzambi songaka profete Yezaya [Bana : Yandi songaka nde Mesia ta kwisa] mpila Yesu ta fwa sambu na masumu na beto. Nzambi vandaka kusonga kukwisa ya Mesia na ntwala, sambu yo vandaka mambu ya nene, mambu ya kuluta nene na Bible ya mvimba.

 **Devoir sambu na bakristo :**

Kana nge me balula ntimba, me yantika kulanda Yesu dezia, kiese mingi. Mposi yai, keti nge ta samba mingi sambu na bantu ya nkaka ya kele na mfunu na Yandi ?

 **Verse ya Kulonguka :**

Bana tuba verse fraze na fraze na nima ya nge, moniteur. Na nima, bo yimba ti kina yo.

 **Bankunga ya kwenda nzila mosi ti leso :**

Yezaya 53 :6

 **Invitation sambu na bo ya me yamba Yesu ntete ve :**

Mbala ya nkaka nge me bakisa ntete ve sambu na nki Yesu fwaka. Beto yonso me sala mbi na meso ya Nzambi. Yo yina, beto me zwa makambo ya nene ti Yandi. Beto me pesa Yandi mukongo, ti Nzambi kele na beto makasi mingi.


Kansi Yandi zola beto mpi. Na mawa na Yandi, Yandi tindaka Mwana na Yandi Yesu Kristo. Yesu salaka masumu ata mosi ve. Kansi Yandi ndimaka kumona mpasi ti kufwa na zulu ya kulunsi. Ntangu yina, Nzambi tulaka mbi na beto yonso na zulu na Yandi. Yandi bakaka ndola na beto.

Ntangu yai, kana muntu mona mawa sambu na mbi na yandi, yandi lenda balula ntimba. Yandi yamba Yesu Kristo. Yesu ta pesa yandi ntimba ya mpa ya zola kulanda Yandi. Ketu nge me yamba Yandi ?

NSUKA YA LESO 27

 Kana ntangu lunga, longuka mikanda ya Bible. Bangindu na p. 49.

Leso 27



**Beto
yonso,
beto
vandaka
kuyungana
bonso
mameme,
konso
muntu na
nzila na
yandi.
Ebuna**

***Mfumu Nzambi tulaka mbi na beto
yonso na zulu na yandi (Yesu
Mesia).***

Yezaya 53 :6

Leso 28. Lulendo bendaka Mfumu Ezekiasi kusala mubulu.

Leso yai ke monika na 2 Bantotila 20:1-21

🎯 Kikuma ya Leso :

Bana ta tina lulendo, sambu bo ta bakisa nde Nzambi zola beto bantu kuvanda na lulendo ve.

♥ Verse ya Kulonguka :

Nzambi kele kunwana na bantu ya lulendo, kansi Yandi ke songa nlemvo na Yandi na bantu yina ke na lulendo ve. Yakobo 4 :6b ...

🗨 Bankunga ya kwenda nzila mosi ti leso :

Kudikulumusa na Meso ya Nzambi
Mo' Ta Kwisa na Nzambi na Lulendo Ve

II. REVISIO

👤 Kuyindula diaka baleso me luta :

Ntangu beto me bika Mfumu Ezekiasi, yandi vandaka kusala mbote, kusosa Nzambi, mpi kutwadisa bantu kusamba Nzambi. Ntangu yandi zwaka mukanda ya tubaka nde Mfumu Senakeribi zolaka kusala yandi mbi, yandi tulaka yo na ntwala ya Nzambi. Nzambi vandaka na kiese na mpila Ezekiasi sosaka Yandi, ebuna Yandi tindaka bawanzio kunwanisa basoda ya Senakeribi.

III. KULONGA LESO YAI

➡ Kuyantika :

Ezekiasi me sala mbote mingi. Keti yandi ta landa yo tii na nsuka ya moyo na yandi ?

🌟 Malongi ya nene ya leso yai (developpement) na banti ya malongi 4 :

28.1 Ezekiasi belaka maladi, ti profete Yezaya songaka yandi nde yandi fweti kufwa.

📖 **Tangila bana :** Bantotila 20 :1-3

1 Na bilumbu yo yina, Ntotila Ezekiasi vandaka na maladi ya ngolo, penepene na kufwa.

Profete Yezaya kwendaka kutala yandi. Yandi songaka yandi nde : « Mfumu Nzambi me tuba nde nge fweti tula bima yonso na ndonga, sambu nge ta fwa. Nge ta beluka ve.

Ebuna Ezekiasi balulaka ilungi na yandi na kibaka na nzo. Yandi sambaka Nzambi nde :

2 Mfumu Nzambi, mono ke sadila Nge na ntima mosi kaka. Mono ke salaka mambu ya ke pesaka Nge kiese. » Ebuna, yandi yantikaka kudila ngolo.

❓ **Yula bana bakestio.**

🏠 **Bana sala bageste.**

🗨 **Bana yimba ti kina.**

28.2 Ezekiasi lombaka Nzambi, ti Nzambi yikaka yandi bamvula 15.

📖 **Tangila bana :** Bantotila 20 :4-7

4 Profete Yezaya basikaka, kansi ...Mfumu Nzambi songaka yandi nde :

5-6 « Vutuka na nzo ya Ezekiasi...tubila yandi nde : 'Mono Mfumu Nzambi...me wa bisambu ti me mona mansanga na nge. Mono ta belula nge. Nge zinga diaka bamvula 15.

7 Yezaya tubaka nde : « Bo sala potopoto ya bafige, bo tula yo na zulu ya kimvimbu ya ntotila, ebuna yandi ta beluka.

❓ **Yula bana bakestio.**

🏠 **Bana sala bageste.**

🗨 **Bana yimba ti kina.**

28.3 Mfumu ya Babilone kwisaka kutala yandi, ti na lulendo, Ezekiasi songaka yandi bimwama na yandi yonso.

📖 **Tangila bana :** Bantotila 20 :12-13

12 Na bilumbu yina, ntotila ya Babilonia...waka nde Ntotila Ezekiasi vandaka kubela. Yandi tindilaka bantu kunatila yandi kado.

13 Ezekiasi yambaka bantu yango. Yandi songaka bo bimwama na yandi yonso, arza ti wolo, mananasi ya kitoko ti mafuta ya ntalu...yandi bumbaka ata kima mosi ve na nzo na yandi to na kimfumu na yandi.

[Bantu tuba nde : 'Lulendo ! Lulendo ! Nge me sala kifu !']

Bansangu 32 :25a Kansi Ezekiasi kumaka lulendo, yandi zolaka ve kupesa mersi na Mfumu Nzambi sambu na mambote ya yandi zwaka...

? Yula bana bakestio.

🏠 Bana sala bageste.

👤 Bana yimba ti kina.

28.4 Yezaya songaka Ezekiasi nde bantu ya Babilone ta kwisa kubaka bimvwama na yandi yonso ya yandi me songa yandi. Ata bana na yandi, bo ta kuma bampika na Babilone.

📖 **Tangila bana :** 2 Bansangu 32 :25b,
2 Bantotila 20 :14, 16, 17

2 Bansangu 32 :25b ...Yo yina, Mfumu Nzambi wilaka yandi makasi...

2 Bantotila 20 :14, 16, 17 Ntangu yai, Profete Yezaya tubaka nde : « Kilumbu kele ya bo ta nata na Babilonia bima yonso ya bankaka na nge me bumba na nzo yai. Ata kima mosi ve ta bikala.

18 Bana na nge ya nkaka, bo ta nata bo na kimpika ti kukumisa bo batongu sambu na kusala na nzo ya ntotila ya Babilonia. »

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mfumu Ezekiasi lombaka Nzambi na ntangu ya maladi. Nzambi yikaka yandi bamvula 15 ya moyo. Kansi Ezekiasi kumaka lulendo. Yandi vutulaka Nzambi matondo ve, ti yandi sadilaka bamvula yina ve na mpila ya pesaka Nzambi kiese. Na lulendo, yandi songaka mbeni na bo mambu ya kinsweki yonso ya bimvwama ya kimfumu.

Nzambi songaka Profete Yezaya kusonga Ezekiasi nde, sambu na lulendo yina, mbeni yina ta kwisa kuyiba bo, kumanisa bimvwama na bo yonso. Bo ta

kumisa bana na yandi mpi bampika. O, mawa mingi ntangu lulendo kota na beto !

👋 **Devoir sambu na bakristo :**

Mukristo, keba nde lulendo kusala nge ve. Lulendo ke lunga ve na beto bantu. Yo kele kaka kubebisa.

♥ **Verse ya Kulonguka :**

Bana tuba verse mbala zole fraze na fraze na nima ya nge, moniteur. Bo yika bageste ti tuba yo mbala zole diaka. Mbala zole ya nsuka, bo tuba fraze ya ntete na ndinga ya ngolo, ti fraze ya nsuka na ndinga ya pima.

👤 **Bankunga ya kwenda nzila mosi ti leso :**

Kudikulumusa na Meso ya Nzambi
Mo' Ta Kwisa na Nzambi na Lulendo Ve

✝ **Invitation sambu na bo ya me yamba Yesu ntete ve :**

Keti lulendo me kanga nge nzila kumona masumu na nge? Mbala ya nkaka, na lulendo nge yindula nde nge kele ndambu mbote, nge ke na mfunu ya kuguluka ve.

Bible ke tuba nde beto yonso kele bankwa-masumu. Kaka Mesia Yesu Kristo lenda gulusa beto, sambu Yandi bakaka ndola na sika ya beto. Kana nge me balula ntima ntete ve, kwenda nswalu na Yandi. Tula Yandi ntima, ti Yandi ta gulusa nge. Yandi ta pesa nge ntima ya mpa sambu nge ta zola kulanda Yandi. Yandi ta kumisa nge mwana na Yandi.

NSUKA YA LESO 28

📖 Kana ntangu lunga, longuka mikanda ya Bible .
Bangindu na p. 49.



***Nzambi kele kunwana na bantu
ya lulendo,
kansi Yandi ke songa nlemvo na
Yandi na bantu yina ke na
lulendo ve.***

Yakobo 4 :6b ...

Leso 29. Manase salaka mbi na mpila nde Nzambi zengaka nde Kimfumu ya Yuda mpi ta bwa.

Yuda kuma na "Point de non-retour" (français)

Leso yai ke monika na 2 Bantotila 20:21, 21 :1-18, Nahumi 1 :2-3

🕒 Kikuma ya Leso :

Bana ta bakisa nde Nzambi kele zuze ya kieleka. Yo yina, bo ta balula ntima, bo ta tina ya Yesu Mvulusi.

♥ Verse ya Kulonguka :

Kansi Mfumu Nzambi kele kaka Mfumu tii kuna. Yandi me tula kiti na Yandi ya kimfumu sambu na kusambisa bantu.

Yandi ta sambisa bantu ya nsi-ntoto na nzila ya masonga. Yandi ke sambisa bantu yonso kiteso mosi. Bankunga 9 :8-9

🗣️ Bankunga ya kwenda nzila mosi ti leso :

🔊 Bu Basantu Kota Zulu
Keti Nge Me Yilama Mbote ?

II. REVISIO

↑ Kuyindula diaka baleso me luta :

Beto me mona nde Ezekiasi me sala mbote mingi na kuyala na yandi. Yandi zolaka Nzambi mingi. Kansi bu Nzambi tindaka profete Yezaya kusonga yandi nde yandi yilama sambu na kufwa, yandi ndimaka ve. Yandi lombaka Nzambi kuyika yandi ntangu. Ebuna Nzambi ndimaka kuyika yandi bamvula 15. Kansi mawa ! Na nima Nzambi me yika yandi bamvula, yandi kumaka lulendo. Yandi salaka buzoba kusonga mbeni bimvwama na yandi yonso.

III. KULONGA LESO YAI

➡ **Kuyantika :** Nki ta salama ntangu yai ? Ketu bambeni ta kwisa kuyiba bima ya kitoko ya Ezekiasi me songa bo ? Ketu bana na yandi ta landa kusadila Nzambi bonso Ezekiasi salaka ntete, to bo ta sala lulendo bonso yandi salaka na nsuka ya moyo na yandi ?

🏠 **Malongi ya nene ya leso yai (developpement) na banti ya malongi 4 :**

29.1 Mwana ya Ezekiasi, Manase, butukaka na kati ya bamvula Nzambi yikaka yandi, bamvula ya lulendo. Manase yingaka Ezekiasi na kimfumu.

📖 **Tangila bana : 2 Bantotila 20 :21, 21 :1a**

20 :21 Ezekiasi kufwaka, ebuna mwana na yandi Manase bikaka kuyinga yandi na kimfumu.

21 :1a Manase me lungisa bamvula 12 ntangu yandi kumaka ntotila ya Yuda.

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

29.2 Manase salaka makambu yonso ya biteki ti ya mbi ya pesaka Nzambi makasi. Yandi bendaka bantu ya Yuda kusala mbi mpi. Mawa !

📖 **Tangila bana : 2 Bantotila 21:2-9**

2-3 Yandi salaka masumu na meso ya Mfumu Nzambi....Manase tungaka diaka bisika ya kusambila banzambi ya biteki, bisika ya tata na yandi Ezekiasi kufwaka. Yandi tungaka bamesa-kimenga sambu na nzambi Baale. Yandi salaka kiteki ya Ashera, nzambi ya nkento...

4.Yandi tungaka bamesa-kimenga ya kusambila banzambi ya nkaka na kati ya Nzo-Nzambi na Yeruzalemi, kisika yina ya Mfumu Nzambi tubaka, 'Awa kisika bantu ta kumisa zina na Mono.'

6.Yandi pesaka nkutu mwana na yandi ya bakala makabu ya kuyoka na banzambi ya kiteki. Yandi sadilaka kinganga-nkisi ti kindoki...Yandi salaka mpenza mambu mingi ya mbi. Yo yina Mfumu Nzambi waka makasi.

9...Bantu ya Yuda wilaka Mfumu Nzambi ve. Manase bendaka bo kusala masumu mingi...

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

29.3 Manase nataka Yuda na sika ya Nzambi lenda lolula bo diaka ve. Nzambi zengaka bo ndola. Yandi songaka na ndinga ya baprofete na Yandi nde Kimfumu ya Yuda fweti kufwa.

📖 **Tangila bana : 2 Bantotila 21 :10-16**

10-11 Ebuna Mfumu Nzambi tubaka mutindu yai

na munoko ya baprofete na Yandi : “Ntotila Manase me sala mambu ya kuluta mbi... Yandi me benda bantu ya Yuda kusala masumu.

12-13 Yo yina Mono ta tindila Yeruzalemi ti Yuda yonso mpasi ya ngolo. Mono ta pesa Yeruzalemi ndola mutindu Mono pesaka Samaria (capital ya kimfumu ya Israele na nord, bwala ya mbeni kufwaka). Yeruzalemi ta kuma ya mpamba, ya kukonda bantu...

14...Mono ta pesa bo na diboko ya bambeni na bo. Bo ta bedisa bo ti baka mpi bima na bo.

16 Manase fwaka bantu mingi. Yeruzalemi fulukaka na menga....

? Yula bana bakestio.

🏠 Bana sala bageste.

👑 Bana yimba ti kina.

29.4 Nzambi songaka baprofete Nahumi ti Habakuki nde Yandi ta sadila bimbumu ya nkaka kupesa ndola na Yuda, kansi na nima Yandi ta zuze bo mpi.

 **Tangila bana :** Nahumi 1 :2-3

2. Mfumu Nzambi kele Nzambi ya kimpala. Yandi ke pesaka ndola na bantu yina lemfukaka na Yandi ve. Yandi ke vutula mbi na bantu yina ke sala Yandi mbi. Yandi ke wila bambeni na Yandi makasi.

3. Mfumu Nzambi ke wa makasi nswalu ve, kansi Yandi ke vilaka ve kupesa ndola na bantu ya mbi.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Manase butukaka na kati ya bamvula 15 ya Nzambi yikaka Ezekiasi, bamvula ya lulendo salaka yandi. Yo ke monika nde mbi yina kotaka ngolo na mwana na yandi, Manase. Manase salaka mbi mingi. Yandi bendaka bantu ya Yuda kusala mbi, kusamba biteki, kusala kindoki.

Yo yina, Nzambi ya kele zuze ya kieleka, Yandi zengaka nde ndola fweti bwa na Yeruzalemi. Yandi kuzengaka kupesa bambeni na bo nzila nde bo kufwa bo, mpila Yandi me sala dezia na Kimfumu ya

Israele. Yai kele « point de non-retour. » Nzambi me zenga zuzema, ndola sambu na bo. Na nima, bo vandaka kuinga kaka ntangu ya ndola yina ta kwisa kusimba bo.

 **Devoir sambu na bakristo :**

Beto bakristo, beto zaba nde zuzema ya Nzambi kele ya kieleka. Beto vutula Yandi matondo sambu beto ta mona zuzema na Yandi ve. Yesu Mesia me futa dezia mfuka na beto na Nzambi sambu na masumu. Yandi me gulusa beto na menga na Yandi.

 **Verse ya Kulonguka :**

Bana tuba verse mbala zole, fraze na fraze na nima ya nge, moniteur. Na nima, lomba bo kutendudila nge verse yina. Na nima, kabisa bana na ba-ekipe. Pesa konso ekipe zina ti sala competisio nki ekipe lenda tuba yo kuluta mbote.

 **Bankunga ya kwenda nzila mosi ti leso :**

Bu Basantu Kota Zulu
Keti Nge Me Yilama Mbote ?

 **Invitation sambu na bo ya me yamba Yesu ntete ve :**

Kana nge me balula ntima ntete ve na Yesu Kristo, zaba nde zuzema ya Nzambi kele kuinga nge. O, tina nswalu na Yesu Kristo, nduku ya bantu ya masumu. Yandi me kudipesa nitu ti menga na Yandi sambu na kufuta ndola yonso ya masumu na nge. Yandi telamaka na lufwa. Bible ke songa nde beto yonso kele bantu ya masumu. Beto ke lunga nde Nzambi kufunda beto. Na ntima nge mpi zaba yo.

Kuma ve na ‘point de non-retour’ na luzingu na nge. Balula ntima ti tula kivuvu yonso na Yesu bubuyai. Yandi ke yamba konso muntu yina ke yambaka Yandi na kieleka yonso.

NSUKA YA LESO 29

 Kana ntangu lunga, longuka mikanda ya Bible .
Bangindu na p. 49.



Leso 29

Mfumu Manase
sambilaka biteki
mingi. Yandi
twadisaka bantu
ya Kimfumu ya
Yuda kusala kiteso
mosi. Yo yina,
Nzambi zengaka
nde Kimfumu ya
Yuda fweti kufwa.

***Kansi Mfumu Nzambi kele kaka
Mfumu tii kuna. Yandi me tula kiti
na Yandi ya kimfumu sambu na
kusambisa bantu.***

**Yandi ta sambisa bantu ya nsi-ntoto
na nzila ya masonga.**

***Yandi ke sambisa bantu yonso
kiteso mosi.***

Bankunga 9 :8-9

Leso 30. Manase balulaka ntima na kimpika, kansi mwana na yandi landaka mbandu na yandi ya ntama.

Leso yai kele na 2 Bansangu 33 :11-18,
2 Bantotila 21 :18-23

🕒 Kikuma ya Leso :

Bana ta bakisa nde Nzambi ke lolula beto kana bo balula ntima, kansi Yandi ta katula ve konso mambu ya nkaka ya mbi ya landa. (français conséquence) Yo yina, bo ta sala ngolo kutina masumu.

♥ Verse ya Kulonguka :

Beno kudikusa ve. Bo ke sekaka Nzambi ve. Muntu ke katulaka bambuma ya yandi me kuna.
Galatia 6 :7

🗨️ Nkunga ya kwenda nzila mosi ti leso :

Masumu Ke Bebisa

II. REVISIO

📖 Kuyindula diaka baleso me luta :

[Bana songa nge mambu yonso ya bo bambuka sambu na Mfumu Manase. Meka kutuba mambu 5 to kuluta.]

III. KULONGA LESO YAI

➡ Kuyantika :

Kingana ke tuba nde, kana nge me lamba maki, mpila kele ve kuvutula yo masa diaka. Manase me lamba diki na yandi. Yandi me sala mbi mingi, na mpila nde Nzambi me zenga nde, 'Mpila kele diaka ve. Ndola kaka fweti kubwa.' Bubu yai beto ta mona mambu ya nkaka ya yituka sambu na mfumu yai, Manase.

🏠 Malongi ya nene ya leso yai (developpement) na banti ya malongi 4 :

30.1 Ndola ya Nzambi kubwaka ! Mfumu ya Asiria kangaka Manase ti nataka yandi na Babilon.

📖 **Tangila bana : 2 Bansangu 33 :**
11 Ebuna (Nzambi) tindilaka bo bamfumu ya

basoda ya Asiria. Bo simbaka Manase. Bo tulaka yandi bandobo na munoko. Bo kangisaka yandi bansinga ya bibende, ebuna bo nataka yandi na bwala Babilone.

? Yula bana bakestio.

🏠 Bana sala bageste.

🗨️ Bana yimba ti kina.

30.2 Kuna na kimpika, Manase balulaka ntima ti bingaka zina ya Nzambi. Yo yina, Nzambi waka ti vutulaka yandi na Yeruzalemi.

📖 **Tangila bana : 2 Bansangu 33 :12-13**
12 Na kati ya mpasi, Manase didilaka Mfumu Nzambi... Yandi ndimaka mbi na yandi yonso na meso ya Nzambi... Yandi bondilaka Nzambi kuwila yandi mawa.

13 Nzambi ndimaka bisambu na yandi. Yandi pesaka yandi nzila na kuvutuka na Yeruzalemi. Bo vutulaka yandi diaka na kimfumu. Ntangu yai, Manase zabaka nde Mfumu Nzambi kele Nzambi mpenza.

? Yula bana bakestio.

🏠 Bana sala bageste.

🗨️ Bana yimba ti kina.

30.3 Manase bwisaka biteki ti tungaka mesa-kimenga na Nzambi na Yeruzalem.

📖 **Tangila bana : 2 Bansangu 33 :14-18**
14-15 Na nima ya mambu yai...yandi katulaka kiteki ti banzambi...yina vandaka na kati ya Nzo-Nzambi ti na bandambu ya nkaka ya Yeruzalemi. Yandi bwisaka yo ti losaka yo na nganda ya bwala.

Yandi bongisaka mesa-kimenga sika bo vandaka kusamba Mfumu Nzambi. Ebuna yandi pesaka makabu ya kinduku ti ya kupesa mersi na zulu na yo. Yandi songaka bantu yonso ya Yuda kusamba Mfumu Nzambi...

? Yula bana bakestio.

🏠 Bana sala bageste.

🗨️ Bana yimba ti kina.

30.4 Mwana ya Manase Amoni yingaka yandi, kansi yandi landaka kaka mbi ya tata na yandi vandaka kusala ntete. Na nima ya bamvula zole, bansadi na yandi fwaka yandi.

**Tangila bana : 2 Bantotila 21 :18-23**

18 Manase kufwaka... Mwana na yandi Amoni bikaka kuyinga yandi na kimfumu.

20-21 Yandi mpi salaka mbi na meso ya Mfumu Nzambi bonso tata na yandi Manase... Yandi sambaka banzambi ya biteki ya tata na yandi vandaka kusamba.

22 Yandi buyaka Mfumu Nzambi... Yandi landaka bansiku na Yandi ve.

23 Bantu na yandi ya kisalu...sosaka mpila ya kufwa yandi, ebuna bo fwaka yandi na nzo ya kimfumu.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mawa na Mfumu Manase ! Yandi balulaka ntima ti bakisaka mbi na yandi. Nzambi lolulaka yandi. Nzambi katulaka yandi na kimpika ti vutulaka yandi na kimfumu na yandi. Yina kiese, kansi dezia mbi ya Manase me simba mwana na yandi, Amoni. Yandi salaka mbi kukonda kubalula ntima. Diki ya Manase, yandi me lamba yo. Mpila kuvutula yo kuvanda ya mobisu vandaka ve.

Masumu mingi kele bonso yai. Nzambi lenda lolula muntu ya masumu ya bizumba. Kansi kana nkento me baka divumu, mpila kuvutula mwana yina kele ve. Nzambi lenda lolula muntu, ata yandi me kufwa muntu ya nkaka. Kansi muntu yina ya yandi me fwa, yandi ta bikala kaka ya kufwa. Nzambi lenda lolula muntu ya masumu ya kuyiba. Kansi ata muyibi vutula bima yandi me yiba, zina ya mbote na yandi ta vutuka ve nswalu.

O, masumu kele mbi ! O, masumu ke bebisa luzingu ya bantu ! Beto sala ngolo kutina masumu.

**Devoir sambu na bakristo :**

Bana bakristo, yindula ve nde, 'O, mono ta sala masumu yai, ebuna na nima mono ta lombapardo.' Nge kele kulamba diki. Mpila kuvutula yo mutindu

yo vandaka, ta vanda ve. Masumu ta bebisa luzingu na nge. Tina yo na ngolo ya Yesu Kristo !

**Verse ya Kulonguka :**

Bana tuba verse mbala 2 fraze na fraze na nima na nge, moniteur. Bo yika bageste ti tuba yo mbala 2 diaka. Na nsuka, bo ya zola, bo meka kutuba yo bo mosi. Bo ya sala mbote lenda simba Bible na nge.

**Nkunga ya kwenda nzila mosi ti lesa :**

Masumu Ke Bebisa

**Invitation sambu na bo ya me yamba Yesu ntete ve :**

Kana nge me balula ntima ntete ve na Yesu Kristo, kutina masumu ta gulusa nge ve. Sambu na nki ? Sambu dezia beto yonso me sala masumu. Bible songa beto pwelele nde "Bantu yonso me sala masumu" (Roma 3 :23). Yo kele na ntima na beto. Beto kele bankwa-masumu. Dezia beto kele cupable na ntwala ya Nzambi.

Ndola ya masumu kele lufwa (Roma 6 :23a). Kansi nge fweti kufwa ve. Nzambi zola nge. Yo yina, Yandi me tinda Mwana na Yandi Yesu Kristo. Yandi zingaka kukonda masumu. Na nima, Yandi ndimaka nde bantu ya kimpala tula Yandi na zulu ya kulunsi. Yo vandaka lukanu ya Nzambi nde Yesu baka ndola ya lufwa na sika na beto, bankwa-masumu. Yesu songaka nde Yandi vandaka kieleka Mwana ya Nzambi na mpila Yandi telamaka na lufwa.

Bubu yai, kana Mpeve ya Nzambi ke songa nge nde nge kele nkwa-masumu, tina nswalu na Yesu Kristo. Binga zina na Yandi na kieleka yonso. Yandi ta gulusa nge. Yandi ta lolula nge. Yandi ta pesa nge ntima ya mpa. Mpeve ya Nzambi ta kota, ti Yandi ta pesa nge ngolo kubuya masumu, kupesa Nzambi kiese. Keti nge ta kwisa na Yandi bubu yai ?

NSUKA YA LESO 30



Kana ntangu lunga, longuka mikanda ya Bible . Bangindu na p. 49.



Leso 30
Bambeni
kangaka
Mfumu
Manase.
Bo
kumisaka
yandi
mpika na
nsi ya
Asiria.
Kuna,
yandi
balulaka
ntima na
Nzambi.

***Beno kudikusa ve.
Bo ke sekaka Nzambi ve.
Muntu ke katulaka
bambuma ya yandi me kuna.***

Galatia 6 :7

Leso 31. Yoziyasi nataka reveil. Yo yina, ndola bwaka ve na bilumbu na yandi.

Leso yai ke monika na 2 Bantotila 21 :24, 22 :1—23 :30, 2 Bansangu 34 :1-19.

🕒 Kikuma ya Leso :

Bana ta bakisa nde Nzambi ke wilaka beto mawa bu beto balula ntima ti sosa Yandi. Yo yina, bo ta sosa Nzambi na ntima na bo yonso.

♥ Verse ya Kulonguka :

Sosa Mfumu Nzambi, ntangu yai ya beno lenda mona Yandi.

Binga zina na Yandi, ntangu yai ya Yandi kele penepene. Yezaya 55 :6

👤 Bankunga ya kwenda nzila mosi ti leso :

Banzambi ya Nkaka
Sosa Ntete

II. REVISIO

† Kuyindula diaka baleso me luta :

Beto me kaka manisa kulonguka mambu ya bamfumu zole ya mbi. Manase, kaka kima mosi beto lenda tuba sambu na yandi kele nde ntangu bambeni kumisaka yandi mpika na Babilone, yandi balulaka ntima. Mwana na yandi Amoni kaka mbi, mbi, mbi. Ata kima mosi ve ya mbote. Bansadi ya Amoni fwaka yandi.

III. KULONGA LESO YAI

➔ Kuyantika :

Kansi na nima bansadi ya Amoni fwaka yandi, bantu ya Yuda fwaka bo mpi. Bo kumisaka mwana ya Amoni zina ya Yoziyasi mfumu. Yoziyasi kaka mwana ya bamvula 8 ntangu yandi yantikaka kuyala Yuda.

Kansi kiese mingi ! Ntangu yandi vandaka kaka jeune, yandi yantikaka kusosa Nzambi. Nki mutindu ? Yo vandaka influence ya mama na yandi, Yedida ? O, kiese sambu Mfumu Yoziyasi yantikaka kusosa Nzambi ! Nzambi me zenga nde Yandi fweti pesa bantu ya Yuda ndola sambu na masumu ya Manase. Keti yo fweti kubwa ntangu yai, to Nzambi lenda kinga ndambu ?

🏠 Malongi ya nene ya leso yai (developpement) na banti ya malongi 4 :

31.1 Yoziyasi, mwana ya Amoni, yingaka yandi. Bu Yoziyasi vandaka kaka jeune, yandi yantikaka kusosa Nzambi.

📖 Tangila bana : 2 Bantotila 22 :1-2

1-2 Yoziyasi vandaka bamvula 8 ntangu yandi kumaka ntotila ya Yuda...Zina ya mama na yandi Yedida. Yoziyasi salaka mambu ya ke pesaka Mfumu Nzambi kiese....

❓ Yula bana bakestio.

🏠 Bana sala bageste.

👤 Bana yimba ti kina.

31.2 Yoziyasi yidikaka diaka Nzo-Nzambi ya me beba.

📖 Tangila bana : 2 Bantotila 22 :3-6

3-6...Yoziyasi...tindaka kalaki Shafani...na Nzo-Nzambi nde : « Kwenda na Hilikia, mfumu ya banganga-Nzambi, yandi sadila mbongo ya bamakabu bantu ke pesa. Bo futa basharpantie, bamaso ti bantu ya nkaka ya kisalu. Bo sumbila bo mpi banti ti matadi sambu na kuyidikila Nzo-Nzambi.

❓ Yula bana bakestio.

🏠 Bana sala bageste.

👤 Bana yimba ti kina.

31.3 Ntangu bo vandaka kuyidika Nzo-Nzambi, bo monaka diaka Mukanda ya Nzambi ! Mfumu Yoziyasi wilaka yo ti balulaka ntima ngolo. Yo yina, Nzambi pesaka Yuda ndola ve na bilumbu na yandi.

📖 Tangila bana baverse yai : 2 Bantotila 22 :8-19

8 ...Hilkia songaka Shafani nde : « Mono me mona Mukanda ya Bansiku na Nzo-Nzambi. » Hilikia pesaka mukanda yina na Shafani ...

9-10 Ebuna yandi vutukaka na mfumu kusonga yandi nde : « Tala mukanda ya Hilikia me pesa mono. » Yandi tangilaka yandi yo.

11 Ntangu ntotila Yoziyasi waka malongi ya mukanda yina, yandi pasulaka bilele na yandi na mawa.

12-13 Yandi nde : « Beno lomba Nzambi sambu na mono ti bantu yonso ya Yuda sambu na

mukanda yai ya bo me mona. Mfumu Nzambi me wila beto makasi mingi sambu bankaka na beto salaka ve mutindu mukanda yai ke tuba. »

Bo kwendaka kuyula mambu yina na profete ya nkento zina ya Hulda.

15-19 Hulda songaka bo... nde : « Mfumu Nzambi ke songa mono nde : « Mono ta pesa ndola na Yeruzalemi ti na bantu na yo. Bo me buyaka Mono. Bo me pesaka makabu na bo na banzambi ya nkaka. Yo me pesaka Mono makasi. Kansi sambu na Ntotila Yoziyasi yandi mosi, Mono ke tuba nde : 'Nge mfumu, wilaka mambu ya bo sonikaka. Nge balulaka ntima na nge. Yo yina, nge ta mona ve bampasi yonso ya Mono ta pesa kisika yai...

? Yula bana bakestio.

🏠 Bana sala bageste.

👤 Bana yimba ti kina.

31.4 Yoziyasi katulaka biteki mingi mutindu na mutindu na Yeruzalemi. Yandi vutulaka mpi bisambu ya kieleka ya Nkinsi ya Paki.

📖 Tangila bana : 2 Bantotila 23 :1-4, 2 Bansangu 35 :1,18

23 :1 Ntangu yai, Ntotila Yoziyasi bingaka bambuta yonso ya Yuda ti ya Yeruzalemi.

2-3 Yandi kwendaka ti bo na Nzo-Nzambi. Yandi wakanaka diaka kulemfukila na Nzambi, kulanda bansiku na Yandi yonso na ntima na yandi ya mvimba, ti kusala mambu yonso ya bo sonikaka na Mukanda ya Nzambi. Bantu yonso ndimaka...

4 Yoziyasi songaka bo kubasisa na Nzo-Nzambi bima yonso ya Baale ti Ashera ti yandi yokaka yo. Ebuna yandi fwaka biteki mingi mosi-mosi.

2 Bansangu 35 :1 Ntotila Yoziyasi salaka Nkinsi ya Paki...sambu na kukumisa Mfumu Nzambi.

18 Katuka ntangu ya profete Samuele tii na lumbu yina, bantu ya Israele salaka ve Nkinsi ya Paki mutindu salaka Yoziyasi...

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mfumu Yoziyasi zingaka na bilumbu na nima Nzambi me zenga dezia ndola ya ngolo sambu na Kimfumu ya Yuda. Kansi yandi sosaka Nzambi na ntima na yandi yonso. Ntangu bo tangilaka yandi Mukanda ya Nzambi ya me vilaka, yandi balulaka ntima ti sosaka kusala yonso ya yo tubaka. Yo yina, Nzambi wilaka yandi mawa. Nzambi ndimaka nde nsuka ya Kimfumu ya Yuda ta kwisa na nima ya na bilumbu ya Yoziyasi.



Devoir sambu na bakristo :

Mwana mukristo, keti nge kele kusosa Nzambi na ntima na nge yonso ? Yai kele devoir Yesu pesaka balonguki na Yandi. « Sosa ntete Kimfumu ya Nzambi » (Matayo 6 :33). Tula ngolo kusala yo mposo yai.



Verse ya Kulonguka :

Bana tuba verse mbala 3 fraze na fraze na nima ya nge, moniteur. Na nima, nge ta tuba « Sosa...Binga, ti bana ta tuba nsuka ya phrase. Sala yo mpi mbala 3.



Bankunga ya kwenda nzila mosi ti leso :

Banzambi ya Nkaka
Sosa Ntete



Invitation sambu na bo ya me yamba Yesu ntete ve :

Mbala ya nkaka nge me bakisa ntete ve nde nge kele na makambu ti Nzambi sambu na masumu na nge. Mono me mona ntete ve muntu ya lenda tuba nde yandi me landa bansiku yonso ya Nzambi. Bible ke tuba nde beto kele bantu ya masumu kukonda ngolo kuchanger beto mosi. Kaka Yesu Kristo lenda changer ntima na nge sambu nge ta zola kusala yina ke pesa Nzambi kiese. Yesu fwaka ti telamaka na lufwa sambu na kuchanger ntima na nge.

Keti nge ta binga zina na Yandi bubu ? O, pesa Nzambi mukongo diaka ve. Balula ntima bubu yai ti yamba Yesu na maboko zole. Nge mpi ta kuma mwana na Yandi.

NSUKA YA LESO 31



Kana ntangu lunga, longuka mikanda ya Bible .
Bangindu na p. 49.



Leso 31
 Shafani
 tangilaka
 Mfumu
 Yoziasi
 Mukanda
 ya
 Nzambi
 ya me
 vila, ti
 Yoziasi
 wilaka
 malongi
 na yo.

***Sosa Mfumu Nzambi, ntangu
 yai ya beno lenda mona
 Yandi.***

***Binga zina na Yandi, ntangu
 yai ya Yandi kele penepene.***

Yezaya 55 :6

Leso 32. Ndola yantikaka kubwa na bilumbu ya Yoakazi.

Leso yai kele na 2 Bantotila 23 :30-34
(2 Bansangu 36 :1-3 ke tuba kiteso mosi.)

🕒 Kikuma ya Leso :

Bana ta bakisa nde yonso ya Nzambi tuba, yo fweti salama kaka. Bo ta sasuka na Yesu Kristo sambu na kutina zuzema na Yandi.

♥ Verse ya Kulonguka :

Mambu ya Mono Nzambi ke tuba, yo ta vutuka ve mpamba na Mono, kansi yo ta sala kisalu ya Mono me tinda yo kusala. Yo ta lungisa luzolo na Mono. Yezaya 55 :10-11

🗨 Bankunga ya kwenda nzila mosi ti leso :

Aleluya, Imene !
Kwisa na Yesu Kristo

II. REVISIO

👤 Kuyindula diaka baleso me luta :

Beto me mona nde bantu ya Israele salaka kaka mbi na meso ya Nzambi. Yo yina, na nsuka Nzambi tulaka bo na maboko ya bambeni na bo. Bo kwendaka kuvanda bampika na kimfumu ya Asiria.

Kimfumu ya Yuda vandaka me bikala. Ndambu bamfumu na bo vandaka mbote, bonso Ezekiasi ti Yoziasi. Kansi na kimfumu ya Manase, mbi na bo lutaka, tii ntangu Nzambi zengaka nde ndola fweti kwisa na bo. Yoziasi sosaka Yandi ti katulaka biteki. Yo yina, Nzambi tubaka nde mbi yina ta kwisa na nima. Yandi ta mona yo ve.

III. KULONGA LESO YAI

➡ Kuyantika :

Keti muntu me sila nge nde mbi fweti kwisa, kansi nge zolaka nde yandi kuvila yo? Mbala ya nkaka mama me tuba nde, 'Ntangu papa vutuka na kisalu, yandi ta pesa nge ndola.' O, kana mama lenda kaka vila mambu yina !

Yo vandaka mpidina na bantu ya Yuda. Nzambi Yandi mosi me sila bo nde ndola fweti kwisa. Na bilumbu ya Mfumu Manase, Yandi zengaka

nde masumu na bo me luta mingi. Yandi wilaka Manase mawa ntangu yandi balulaka ntima ti sosaka Yandi ngolo na nsuka ya moyo na yandi.

Kansi Nzambi vilaka ve nde Yandi me sila bo ndola. Nzambi lenda kuvila ve. Yina ya Yandi tuba, Yandi fweti sala yo kaka.

🏠 Malongi ya nene ya leso yai (developpement) na banti ya malongi 4 :

32.1 Bantu ya Yuda tulaka Yoakazi mwana ya Yoziasi, kuyinga yandi, kansi Yoakazi salaka kaka mbi.

(Moniteur, songa bana nde bo kuwa mbote. Konso ntangu nge tuba zina 'Yoakazi', bo yonso ta tuba 'Kaka mbi, kaka mbi'. Kana bo tuba yo ve, nge songa bo diboko sambu na kubambukisa bo.)

📖 Tangila bana : 2 Bantotila 23 :30b-32

30b Ebuna bantu ya Yuda solaka Yoakazi (Bana : 'Kaka mbi, kaka mbi') mwana ya Yoziasi. Bo tulaka yandi ntotila na kisika ya tata na yandi.

32 Yoakazi (Bana : 'Kaka mbi, kaka mbi') salaka mbi na meso ya Mfumu Nzambi. Yandi landaka mbandu ya bankaka na yandi.

❓ Yula bana bakestio.

🏠 Bana sala bageste.

🗨 Bana yimba ti kina.

32.2 Mfumu ya Ezipte Neko kangaka Yoakazi (Bana : 'Kaka mbi, kaka mbi') bansinga ti nataka yandi na Ezipte. Yoakazi me yala kaka bangonda tatu.

📖 Tangila bana :

33 Kimfumu na yandi sukaka ntangu Neko, ntotila ya nene ya Ezipte, nataka yandi na boloko...

34b Neko nataka yandi na Ezipte. Ko kuna mpi yandi fwaka.

❓ Yula bana bakestio.

🏠 Bana sala bageste.

🗨 Bana yimba ti kina.

32.3 Mfumu ya Ezipte Neko tulaka Eliakimi mpangi ya Yoakazi (Bana : 'Kaka mbi, kaka mbi') mfumu na Yuda. Yandi balulaka zina na yandi, yo

kuma Yoyakimi.



Tangila bana :

34a Ebuna Mfumu Neko bakaka Eliakimi mwana ya Yoziyasi (Bana : 'Kaka mbi, kaka mbi'), yandi tulaka yandi ntotila na kisika ya Yoziyasi (Bana : 'Kaka mbi, kaka mbi'). Yandi pesaka yandi zina ya nkaka Yoyakimi.

? Yula bana bakestio.

🏠 Bana sala bageste.

👤 Bana yimba ti kina.

32.4 Neko bendaka bantu ya Yuda na kingolo-ngolo nde bo futisa yandi mpaku.



Tangila bana :

33b Neko songaka bantu ya Yuda kufuta bakilo 3000 ya arza ti bakilo 30 ya wolo.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Nzambi songaka Manase nde ndola ta kwisa. Ntangu yai yo me yantika. Mfumu ya Ezipte me kanga Yoakazi (Bana : Kaka mbi, kaka mbi'), me tula yandi mpika, me yangisa bantu ya Yuda na mpaku. Ndinga ya Nzambi fweti salama. Yonso ya Nzambi tuba, Yandi fweti sala yo kaka.



Devoir sambu na bakristo :

Beto bakristo, beto zaba nde Nzambi me tuba nde ndola ta kwisa na bantu yonso ya tula kivuvu na Yesu ve. Yesu tubaka nde « konso muntu ke lemfukilaka Mwana yina ve, yandi ta baka moyo ve, kansi Nzambi ta wila yandi makasi » (Yoane 3 :36b). Keti nge ke samba sambu na bantu ya zaba Yesu ve ? Kana Nzambi kangula nge nzila, keti nge ke songa bo nzila ya kuguluka na Yesu ?



Verse ya Kulonguka :

Bana tuba verse mbala 2, fraze na fraze na nima ya nge, moniteur. Na nima, bagroupe ya bana ta tuba yo selo bakulere ya bo ke lwata. Na nsuka, bo yonso na nangula maboko ti nikisa misapi ntangu bo ke tuba yo.



Bankunga ya kwenda nzila mosi ti leso :

Aléluya, Imene !

Kwisa na Yesu Kristo



Invitation sambu na bo ya me yamba Yesu ntete ve :

Kansi nge mosi, kana nge me balula ntete ve ntima na nge, zaba nde verse yina ke tuba sambu na nge. Nge "ta baka moyo ve. Nzambi ta wilaka nge makasi." Sambu na nki ? Sambu nge me sala masumu na meso na Yandi. Yandi tindaka Mwana na Yandi Yesu sambu na kugulusa nge, kansi nge ndimaka Yandi ve.

Kansi kuwa partie ya ntete ya verse yina. "Konso muntu yina me ndima Mwana yina (Yesu) na ntima na yandi, YANDI KE NA MOYO ya mvula na mvula."

Kiese ! Nge lenda guluka, kana nge ta ndima Yesu Kristo na ntima na nge. Nge lenda vanda na moyo ya Nzambi. Kaka Yesu lenda gulusa nge. O, binga zina na Yandi sesepiyai.

NSUKA YA LESO 32



Kana ntangu lunga, longuka mikanda ya Bible. Bangindu na p. 49.



***Mambu ya Mono Nzambi ke
tuba, yo ta vutuka ve mpamba
na Mono,
kansi yo ta sala kisalu ya Mono
me tinda yo kusala.
Yo ta lungisa luzolo na Mono.***

Yezaya 55 :10-11

Leso 33. Yoyakimi yokaka Mukanda ya Nzambi tiya.

Leso yai ke monika na 2 Bansangu 36 :5-8, Yeremia 36

🕒 Kikuma ya Leso :

Bana ta zaba nde Ndinga ya Nzambi kele kieleka.
Yo yina, bo ta wila yo.

♥ Verse ya Kulonguka :

...Nzambi ke tuba nde : 'Kana beno wa ndinga na Mono bubu yai, Kusala ntu-ngolo ve...'
Baebreo 3 :15

🔊 Bankunga ya kwenda nzila mosi ti leso :

Kuwa Bible
O Bible Kele Kieleka
Beto Me Wa

II. REVISIO

† Kuyindula diaka baleso me luta :

Mawa na mawa ! Bantu ya Yuda me sala mbi mingi bonso bampangi na bo Israele. Na bilumbu ya Mfumu Manase, Nzambi zengaka nde mbi na bo me luta, Yandi fweti pesa bo ndola kaka. Ndola yantikaka kubwa na bilumbu ya Mfumu Yoakazi. Mfumu ya Ezipte kumisaka yandi mpika ti tulaka mpangi na yandi Yoyakimi mfumu ya Yuda. Ha! Nge zaba nde nge kele mpika dezia, ntangu mfumu ya nsi ya nkaka ke zenga nani kele mfumu na nsi na nge !

III. KULONGA LESO YAI

➔ Kuyantika :

Ntangu yai, Yoyakimi me kuma mfumu ya Yuda. Mfumu ya Ezipte pesaka yandi kiyeka yina. Nki yandi ta sala ? Ketu yandi ta wa ndinga ya Nzambi ? Nkaka na yandi Yoziase waka ndinga ya Nzambi, yo yina Nzambi silaka nde ndola ta kwisa ve na bilumbu na yandi. Ketu Yoyakimi ta wa ndinga ya Nzambi bonso nkaka na yandi ?

🏠 Malongi ya nene ya leso yai (developpement) na banti ya malongi 4 :

33.1 Nzambi songaka profete na Yandi Yeremia kusunika ndinga na Yandi na mukanda. Yeremia tindaka secretaire na yandi Baruki kutanga yo na Nzo-Nzambi na lumbu ya fete.

📖 Tangila bana : Yeremia 36 :1-10

1-3 (Yeremia ke tuba)...Mfumu Nzambi songaka mono nde : Sonika mambu yonso ya Mono songaka nge... Mbala ya nkaka, ntangu bantu ya Yuda ta wa...bo ta bikisa banzila na bo ya mbi...

4-6 Ntangu yai, mono Yeremia, mono bingaka Baruki ti yandi sonikaka bandinga ya Nzambi pesaka mono. Ebuna mono songaka Baruki nde : ...Kwenda kutanga mukanda yai na ndinga ya ngolo na Nzo-Nzambi...

8 Yo yina, Baruki kwendaka na Nzo-Nzambi. Yandi tangaka mukanda yina...

10 Bantu waka Baruki kutanga na mukanda mambu yonso ...

? Yula bana bakestio.

🏠 Bana sala bageste.

🔊 Bana yimba ti kina.

33.2 Na nima, Baruki tangaka yo na bana ya mfumu, ti na Mfumu Yoyakimi, yandi mosi. Kansi Yoyakimi yokaka yo tiya sambu na kubuya ndinga na yo ya tubaka nde Babilonia ta bedisa bo.

📖 Tangila bana : Yeremia 36 :11-26

11 Mikaya, mpangi ya konseye ya mfumu, waka Baruki kutanga mambu ya Mfumu Nzambi tubaka.

12-13 Yandi kwendaka na kisika bantu yonso ya leta vandaka kusala reunio. Yandi telaka bo mambu yonso.

14 Bantu ya leta tindaka Yehudi nde :
« Kwenda kusonga Baruki, yandi kwisa na mukanda. » Ebuna Baruki kwisaka.

15 Bo songaka yandi nde : « Tangila beto. » Baruki tangaka.

16,19 Ntangu yandi manisaka kutanga, bo songaka yandi nde : « Beto fweti songa mambu yai na mfumu. Nge ti Yeremia, beno kwenda kubumbana. Kusonga ata muntu ve kisika beno kele. »

20-21 Yehudi kwisaka kutangila ntotila ti bantu na yandi yonso...

23 Konso ntangu, kana Yehudi me manisa

kutanga bitini tatu to iya...mfumu vandaka kubaka mbele na yandi, yandi zenga-zengaka yo. Ebuna yandi tulaka yo na tiya, tii kuna mukanda yonso manaka ya kupia.

26 Ebuna yandi songaka... « Beno kwenda simba profete Yeremia ti kalaki na yandi Baruki. » Kansi Mfumu Nzambi bumbaka bo.

? Yula bana bakestio.

🏠 Bana sala bageste.

👤 Bana yimba ti kina.

33.3 Nzambi songaka Yeremia kusonika diaka ndinga na Yandi.

📖 Tangila bana : Yeremia 36 :27-31

27-28 Ntangu Mfumu Yoyakimi me yoka imene mukanda...Mfumu Nzambi tubaka na Yeremia diaka nde : «Sonika diaka mambu yonso ya vandaka na mukanda ya ntete.

31 Mono ta pesa ndola na Yoyakimi ti bana na yandi ti basielo na yandi sambu na masumu na bo. Ndola yina ta simba Yeruzalemi yonso ti Yuda yonso, sambu bo wilaka ndinga na Mono ve.

? Yula bana bakestio.

🏠 Bana sala bageste.

👤 Bana yimba ti kina.

33.4 Mutindu ndinga ya Nzambi tubaka, mfumu ya Babilonia kwisaka. Yandi kangaka Yoyakimi miniololo ti nataka yandi kuvanda mpika na Babilone. Yandi yibaka mpi bima mingi ya kitoko na Nzo-Nzambi.

📖 Tangila bana : 2 Bansangu 36 :5-6

5 Yoyakimi salaka mambu ya vandaka kupesa Mfumu Nzambi kiese ve.

6 Nabu, ntotila ya nene ya nsi ya Babilonia, kwisaka kukota na ntoto ya Yuda. Yandi simbaka Yoyakimi ti kangisaka yandi bansinga ya bibende. Ebuna yandi nataka yandi na Babilonia.*

Yandi nataka mpi bima ya nkaka ya ntalu ya vandaka na nzo-Nzambi...

? Yula bana bakestio.

🏠 Bana sala bageste.

👤 Bana yimba ti kina.

>< Kumanisa Malongi :

Yoyakimi yindulaka nde kana yandi yokaka mukanda ya ndinga ya Nzambi tiya, mambu yo tubaka ta salama ve. Kansi ndinga ya Nzambi fweti salama ! Nzambi ke tuba kaka mambu ya kieleka. Ata muntu lenda manisa Ndinga ya Nzambi ve. O, Yoyakimi ! Mbote nge zolaka kuwila yo !

♥ Verse ya Kulonguka :

Bana sala geste bonso bo ke simba Bible, ke nangula yo. Bo tuba verse mbala zole fraze na fraze na nima ya nge, moniteur. Bo sala geste bonso bo ke simba Bible na luzolo, bo tuba ya bo mbala zole diaka. Bo sala geste bonso bo me kangula Bible, ke tanga yo. Bo tuba verse mbala zole diaka.

👤 Bankunga ya kwenda nzila mosi ti lesa :

Kuwa Bible

O Bible Kele Kieleka

Beto Me Wa

👤 Devoir sambu na bakristo :

Bana bakristo, beto wila ndinga ya Nzambi. Beto tula ngolo na kuwa yo lumbu na lumbu. Ntangu beto kuwa yo, beto ndima yo na ntima. Beto tula ngolo kulemfuka na yo.

✝ Invitation sambu na bo ya me yamba Yesu ntete ve :

Mono zola tuba fioti na beno ya me yamba Yesu ntete ve. Ndinga ya Nzambi ke tuba nki sambu na beno ? Yo ke tuba nde beno kele na moyo ve, nde beno ke zinga na mpimpa, na lufwa ya kimpeve. Masumu me fwa kinduku na nge ti Nzambi.

Nsangu ya mawa ! Kansi yina nsuka ve. Bible ke tuba mpi nde Nzambi zola nge mingi. Yandi tindaka Mwana na Yandi Yesu Kristo sambu na kubaka ndola ya mambi yonso ya nge me sala. Yesu telamaka na lufwa. Yandi kele na moyo bubuyai. Kana nge zola balula ntima ti yantika kulanda Yandi, Yandi ta gulusa nge. Keti nge ta ndima ?

NSUKA YA LESO 33

📖 Kana ntangu lunga, longuka mikanda ya Bible. Bangindu na p. 49.

Mfumu Yoyakimi yokaka mukanda ya Ndinga ya Nzambi, kansi ndinga na yo salamaka mutindu Nzambi tubaka.

Leso 33



***...Nzambi ke tuba nde :
‘Kana beno wa ndinga na
Mono bubu yai,
Kusala ntu-ngolo ve...’***

Baebreo 3 :15

Leso 34. Nzambi nganinaka bantu ya Yuda na munoko ya baprofete na Yandi. Yandi songaka mpi nde Mesia fweti kwisa.

Leso yai me katuka na bitini ya mikanda ya baprofete Sofonia, Habakuki, ti Mishe.

I. PREPARATION SAMBU NA MONITEUR-

🕒 Kikuma ya Leso :

Bana ta tula Yesu Mesia nene na luzingu na beto, bonso baprofete tulaka Yandi nene, bonso Nzambi tulaka Yandi nene na kati ya Bible ya mvimba.

♥ Verse ya Kulonguka :

« Nge bwala ya Betlehemi, ata nge kele bwala mosi ya fioti na ntoto ya Yuda, kansi Mono ta basisa na nge Mfumu yina ta yalaka bantu ya Israele, Yandi yina me zinga mvu ya mvu. »
Mishe 5 :1

🔊 Nkunga ya kwenda nzila mosi ti leso :

🔊 O Bwala ya Fiote Betlehemi

II. REVISIO

📖 Kuyindula diaka baleso me luta :

Beto me mona nde Mfumu Yoyakimi buyaka ndinga ya Nzambi. Yo yina, Nzambi salaka nde bambeni na Babilonia kwisa kukanga yandi. Yandi kumaka mpika na nsi ya ntama. Mawa !

III. KULONGA LESO YAI

➡ Kuyantika :

Bana, keti nge me mona papa mosi ya vandaka kupesa bana na yandi ndola ya ngolo kana bo lemfukilaka yandi ve ? Ketu nge me mona papa ya pesaka ndola ya ngolo, kansi na nsuka na yo, yandi simbaka mwana ti tubaka nde, « Mwana na mono, mono zola nge mingi ? »

Nzambi kele papa ya mutindu yina. Baprofete mingi songaka yo. Beto me wa zina ya Profete Yezaya ti Profete Yeremia, ya sonikaka mikanda ya nene na kati ya Bible na beto. Baprofete ya nkaka mpi tubaka na zina ya Nzambi ti sonikaka mikanda ya nkufi na kati ya Bible. Bubuyai beto ta mona tatu na kati na bo—Profete Sofonia, Profete Habakuki, ti

Profete Mishe. (Bana tuba bazina yina.)

🏠 Malongi ya nene ya leso yai (developpement) na banti ya malongi 4 :

34.1 Profete Sofonia nganinaka bantu ya Yuda nde Nzambi ta zuze Yeruzalemi ti bansi ya nkaka. Yandi monaka nde na bilumbu na nima-a-a, Mesia ta yala na ntoto, ti ntangu ya kiese ta kwisa.

📖 Tangila bana : Sofonia 1 :4-17

4-6 (Nzambi nde :) « Mono ta fwa bantu ya Yuda ti ya Yeruzalemi, bantu yina me buya Mono Mfumu Nzambi, ke landa Mono ve...ke kwisa na Mono ve, ke yulaka Mono ve na kusadisa bo.

Sofonia tubaka nde ntangu ya zuzema, ya ndola fweti kwisa. Kansi Nzambi songaka Sofonia mpi ntangu na nima—ntangu ya me kwisa ntete ve, kansi yo fweti kwisa lumbu mosi. Lumbu mosi, Mesia fweti yala nsi-ntoto ya mvimba. Yo ta vanda mutindu yai :

3 :9 Ebuna Mono ta sala na mpila nde bantu yonso kuvanda na munoko ya mbote sambu bo yonso ta sadila kaka Mono Mfumu Nzambi.

11,13...Beno ta mona diaka nsoni ve...bo ta zinga mbote ti na ngemba...

14,17 Bantu ya Israele, beno yimba na kiese, beno tula milolo ! Bantu ya Yeruzalemi, beno sepela ! Na kilumbu yina, Mfumu Nzambi, Nzambi na beno, ta vanda na nge !

❓ Yula bana bakestio.

🏠 Bana sala bageste.

🔊 Bana yimba ti kina.

34.2 Nzambi songaka Profete Habakuki nde Yandi vandaka na nzila kutedimisa bantu ya Babilonia sambu na kusala zuzema na Yandi na Yeruzalemi. Kansi na nima, Yandi ta pesa bo mpi ndola.

📖 Tangila bana : Habakuki 1 :6, 3 :16

6 Mono ke tedimisa bantu ya nsi ya Babilonia, bantu mosi ya nku...Bo ta tambula nsi-ntoto ya mvimba kubotula bantoto ya bantu ya nkaka.

3 :16....Mono ta vingila na pima yonso kilumbu ya ke kwisa, ntangu Nzambi ta pesa ndola na bantu yina ke nwanisa beto.

? Yula bana bakestio.

🏠 Bana sala bageste.

👤 Bana yimba ti kina.

34.3 Nzambi songaka Profete Mishe mpila

Yeruzalemi ta bwa. Yandi tangaka mambi na bo. Yandi buyaka ngindu na bo nde Nzambi ta pesa bo kaka kiese na kiese sambu bo vandaka bantu na Yandi.

📖 **Tangila bana :** *Mishe 1 :1-16, 2 :6-12*

1 Mukanda yai ke songa mambu ya Mfumu Nzambi tubaka na Mishe...Mambu yango ke tadila bwala Yeruzalemi.

2-3...Mfumu Nzambi ke kwisa kusambisa beno.

5 Mambu yai yonso ta bwa sambu bantu ya Israele salaka mubulu na Mfumu Nzambi...

16 ...Bana na beno, bo ta nata bo na kimpika...

2 :6 Bantu ke songa mono nde : « Kulonga beto diaka ve ! Kulonga diaka ve bamambu yina yonso. Nzambi ta sambisa beto nsoni ve !

3 :11...Bo nde : « Keti Mfumu Nzambi kele ti beto ve ? Ata mpasi mosi ta bwila beto ve ! »

12 Yo yina, sambu na mbi na beno, bambeni ta bundula bwala bonso bilanga. Bwala Yeruzalem, bo ta fwa yo. Yo ta bikala mayumba na mayumba. Ngumba yina kele Nzo-Nzambi ta kuma mfinda.

? Yula bana bakestio.

🏠 Bana sala bageste.

👤 Bana yimba ti kina.

34.4 Nzambi songaka Profete Mishe sika ya Mesia ta butuka, bamvula mingi na ntwala yo salamaka na Mfumu na beto Yesu Kristo.

📖 **Tangila bana baverse yai :** [Moniteur, NB : Yai kele verse ya beto kulonguka bubu yai.]

« Nge bwala ya Betlehemi, ata nge kele bwala mosi ya fioti na ntoto ya Yuda, kansi Mono ta basisa na nge Mfumu yina ta yalaka bantu ya Israele, Yandi yina me zinga mvu ya mvu. »
Mishe 5 :1

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Baprofete mingi, ata bo vandaka kusonga zuzema ya vandaka kukwisa, Nzambi kangulaka meso na bo nde bo tala ntama-a-a-a. Bo monaka nde Nzambi ta tinda Mesia sambu na kuvulusa bantu ya kwikila Yandi. Profete Mishe monaka nde Mesia ta butuka na bwala mosi ya fioti—Betlehemi. Mesia vandaka nene na mambu ya Nzambi songaka bo.

👤 Devoir sambu na bakristo :

Beto bakristo, beto zaba nde Mesia kele Yesu Kristo. Keti nge ta tula Yandi nene na mabanza ti na luzingu na nge na mposho yai ?

♥ Verse ya Kulonguka :

Bana tuba verse mbala 2 fraze na fraze na nima na nge, moniteur. Bo yika bageste ti tuba yo mbala 2 diaka. Bo tambula na ndonga na mpila ritimika kutuba yo mbala 2 ya nsuka.

👤 Nkunga ya kwenda nzila mosi ti leso :

O Bwala ya Fioti Betlehemi

✝ Invitation sambu na bo ya me yamba Yesu ntete ve :

Kana Mpeve ya Nzambi ke songa nge nde, nge me balula ntima na Yesu ntete ve, kuinga diaka ve. Yesu me bika nzo na Yandi na zulu sambu na kugulusa nge. Yandi fwaka na sika na nge. Yandi me nungaka lufwa. Yandi telamaka. Bubuyai Yandi ke vandaka na diboko ya kibakala ya Tata Nzambi na lukumu yonso. Yandi ke lunga nde nge kulanda Yandi. Keti nge ta yamba Yandi bubu yai ?

NSUKA YA LESO 34

📖 Kana ntangu lunga, longuka mikanda ya Bible. Bangindu na p. 49.

Leso 34



Profete Mishe songaka bamvula mingi na ntwala nde Mesia fweti butuka na bwala ya fioti Betelehem.

***« Nge bwala ya Betelehem,
ata nge kele bwala mosi ya fioti
na ntoto ya Yuda,
kansi Mono ta basisa na nge
Mfumu yina ta yalaka bantu ya
Israele,
Yandi yina me zinga mvu ya
mvu. »***

Mishe 5 :1

Leso 35. Nzambi landaka kupesa ndola na ntangu ya Yoyakini.

Leso yai kele na 2 Bantotila 24 :6-16.

I. PREPARATION SAMBU NA MONITEUR-

🎯 Kikuma ya Leso :

Bana ta balula ntima, bo ta yamba Yesu ti bika nzila ya mbi yonso. Bo ta bakisa nde ndola ya Nzambi ke landa bo yina balula ntima ve, kansi bo landa kaka na mbi na bo.

💖 Verse ya Kulonguka :

Muntu ya mbi kubika nzila na yandi ya mbi. Muntu ya nku kubika bangindu na yandi ya nku.

Bo vutuka na Mfumu Nzambi sambu Yandi kuwila bo mawa.

Bo vutuka na Nzambi na beto. Yandi ke lembaka ve na kulolula. Yezaya 55 :7

👤 Bankunga ya kwenda nzila mosi ti leso :

Masumu Ke Bebisa

Mono Me Sila Kulanda Yesu

Vutuka, Afrika Vutuka !

II. REVISIO

📖 Kuyindula diaka baleso me luta :

O, bantu ya Yuda me sala masumu mingi !
Nzambi me tindila bo bapofete mingi kubinga
bo kuvutuka na Yandi : bapofete Yezaya,
Yeremia, Sofonia, Habakuki, Mishe, ti ya nkaka.
Kansi bantu ya Yuda wilaka bo ve. Ata ndambu
bamfumu tesaka kuvutuka na Nzambi, ya nkaka
salaka mbi mingi ti buyaka Nzambi sambu na
kulanda biteki ya mpamba. Nzambi songaka bo
nde kana bo balula ve, ndola ta bwa.

III. KULONGA LESO YAI

➡ Kuyantika :

Na mawa ya Nzambi, Yandi tindaka ndola mbala
mosi ve. Ndambu ndola kwisilaka bo. Bo vandaka
na ntangu kubalula sambu ndola ya nkaka kwisa ve.
Kansi bo landaka kaka mbi na bo. Yo yina, ndola ya
nkaka landaka kaka. O, mawa na bantu ya balula
ve ntangu Nzambi songa bo nde bo me sala mbi !

🏠 Malongi ya nene ya leso yai (developpement) na banti ya malongi 4 :

35.1 Yoyakini yingaka tata na yandi Yoyakimi na kimfumu, kansi yandi landaka kaka kusala mbi.

📖 Tangila bana : 2 Bantotila 24 :8-9

8 Yoyakini kumaka mfumu ya Yuda ntangu yandi me lungisa bamvula 18. Yandi yalaka na Yeruzalemi bangonda 3...

9 Yandi salaka mbi na meso ya Mfumu Nzambi...

? Yula bana bakestio.

🏠 Bana sala bageste.

👤 Bana yimba ti kina.

35.2 Mfumu ya Babilonia ziungaka Yeruzalemi, ebuna Yoyakini kudipesaka na yandi. Fami ti basielo yonso kumaka bampika na Babilonia. Ndola ya Nzambi !

📖 Tangila bana : 2 Bantotila 24 :10-11

10-11 Ntangu yandi vandaka kaka mfumu, basoda ya Ntotila Nabu ya Babilonia, bo kwisaka kunwanisa Yeruzalemi. Ntangu bo ziungaka yo, Ntotila Nabu yandi mosi kwisaka kukuma mpi. Ebuna Mfumu Yoyakini ti mama na yandi, bana na yandi, basoda na yandi ti bantu yonso na yandi, bo kwendaka kudipesa na Ntotila ya Babilonia. Ebuna Nabu tulaka Yoyakini na boloko...

? Yula bana bakestio.

🏠 Bana sala bageste.

👤 Bana yimba ti kina.

35.3 Nabu yibaka diaka bima ya ntalu ya Nzo-Nzambi. Nsoni mingi. Ndola ya Nzambi ! O, sambu na nki bo balulaka ve ?

📖 Tangila bana : 2 Bantotila 24 :13

13 Nabu bakaka bima yonso ya ntalu ya Nzo-Nzambi ti ya nzo ya ntotila. Mutindu Mfumu Nzambi tubaka na ntwala, yandi pasulaka malonga yonso ya wolo...

? Yula bana bakestio.

🏠 Bana sala bageste.

👤 Bana yimba ti kina.

35.4 Mfumu ya Babilone kangaka bantu yonso ya nene ti kumisaka bo bampika na nsi na yandi. Kansi bansukami yandi bikaka na ntoto. Ndola ya Nzambi !

 **Tangila bana : 2 Bantotila 24 :14-16**

14 Ebuna Nabu nataka na kimpika bantu yonso ya Yeruzalemi, bambuta ti bamvwama, bo yonso na kimvuka 10,000, ti bantu ya kisalu ya maboko. Kaka bansukami mpamba kubikalaka.

16 Yandi nataka bantu yonso ya nene, bo yonso bantu ya ngolo me lunga mpi na kisalu ya kisoda.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Ndola ya Nzambi landaka sambu bo balulaka ntima ve. Bo kumaka kaka bampika na nsi ya ntama. Profete Yezaya bingaka bo kuvutuka na Nzambi sambu Nzambi ke lembaka ve kulolula. Kansi bo landaka kaka nzila na bo. Yo yina ndola landaka kaka.



Devoir sambu na bakristo :

Beto bakristo, beto zaba nde Nzambi me lolula beto sambu na menga ya Yesu. Kansi ata beto, mbala na mbala beto kubwa na mambu ya mbi. Kana Mpeve ya Nzambi songa beto yo, mbote beto balula nswalu ti lomba pardon. Nzambi ta lolula beto !



Verse ya Kulonguka :

Bana tuba verse mbala 2 fraze na fraze na nima ya nge, moniteur. Na nima, bo yika bageste ke songa kuvutuka, bo tuba yo mbala 1 diaka. Na nsuka, bo yonso balula sika ya bo kele, bo tuba yo mbala 2 ya nsuka.



Bankunga ya kwenda nzila mosi ti leso :

Bana yimba mosi ya bankunga yai---
Masumu Ke Bebisa
Mono Me Sila Kulanda Yesu
Vutuka, Afrika Vutuka !

✝ Invitation sambu na bo ya me yamba Yesu ntete ve :

Beno yina me balula ntete ve ntima sambu na kuyamba Yesu Kristo, zaba nde ndola ya Nzambi ke landa beno kaka. Yesu tubaka nde, “Konso muntu yina me ndima Mono na ntima na yandi, yandi ke na moyo ya mvula na mvula, kansi konso muntu ke lemfukilaka Mono Mwana ya Nzambi ve, yandi ta baka moyo ve, kansi Nzambi ta wilaka yandi makasi” (Yoane 3 :36)

Kana muntu zola kuguluka, yandi fweti balula. Balula zola tuba nde nge vandaka kwenda na directio mosi, kansi nge changer, nge vutuka na nzila ya nkaka. Basoda sala yo ntangu bo ke marche. Na français, beto tuba ‘volte-face’. ‘Balula !’ Kubalula ntima na Yesu kele kuchanger mabanza sambu na Yandi—kuyamba Yandi na maboko yonso zole. Kubalula ntima na Yesu kele kupesa Yandi nzila :

- kuchanger ntima na nge,
- kukatula mambu ya mbi ti kulolula yonso,
- kupesa nge ntima ya mpa ya zola kulanda nzila na Yandi.

Yai ta monika na luzingu ya mpa. Nge ta sala yo parfaitement ve, kansi nge ta yantika kulanda Yesu ti kusala luzolo na Yandi.

Kana nge zaba ve kana nge me balula ntima na Yesu mutindu yina, beto kele na kiese kusolula ti nge na nima ya ecodim bubu.

NSUKA YA LESO 35

 Kana ntangu lunga, longuka mikanda ya Bible. Bangindu na p. 49.



**Nabu, Mfumu ya Babilonia, kumisaka Yoyakini mpika na yandi.
Yai vandaka ndola ya Nzambi sambu Yoyakini wilaka ve ndinga ya Nzambi.**

***Muntu ya mbi **kubika** nzila
na yandi ya mbi.***

***Muntu ya nku **kubika**
bangindu na yandi ya nku.***

***Bo **vutuka** na Mfumu
Nzambi, sambu Yandi
kuwila bo mawa.***

***Bo **vutuka** na Nzambi na
beto. Yandi ke lembaka ve
na kulolula.***

Yezaya 55 :7

Leso 36. Mfumu ya mbi Sedasiasi tulaka Yeremia na prison na dibulu ya potopoto, kansi muntu ya ndombe gulusaka yandi.

Leso yai ke monika na Yeremia 37 & 38 :1-13.

I. PREPARATION SAMBU NA MONITEUR-

Yidika na Ntwala :

Muntu yina ke na Bible kukangula na mukanda ya Yeremia. Beto ta sadila yo na ntangu beto yantika leso.

🎯 Kikuma ya Leso :

Bana ta vanda nswalu kuwila Ndinga ya Nzambi. Bo ta bakisa nde ndinga na Yandi fweti salama ata beto tuba nki to sala nki.

💖 Verse ya Kulonguka :

(Nzambi), Nge ke salaka mpi mambu mutindu Nge ke tubaka tii kuna... Bankunga 119 :90a

🗣️ Bankunga ya kwenda nzila mosi ti leso :

Beto Me Wa
O Bible Kele Kieleka

II. REVISIO

📖 Kuyindula diaka baleso me luta :

Bantu ya nkaka yindula nde kana bo buya Ndinga ya Nzambi, mambu to tuba, yo ta salama ve. Yindula Mfumu Yoyakimi. Yandi buyaka Ndinga ya Nzambi nki mutindu ? (Ee, Yandi yokaka mukanda na yo tiya.) Keti Ndinga ya Nzambi sukaka sambu yandi salaka yo ? Ikele ve. Nzambi songaka Yeremia kusonika yo diaka. Beto lenda mona ndinga yandi sonikaka tii bubuyai na kati na Bible. Beto ta tanga ndambu na yo bubu na mukanda ya Yeremia.

III. KULONGA LESO YAI

➡ Kuyantika :

Bubu beto me kuma na Mfumu ya nsuka ya Yuda. Tala mpila yandi mpi buyaka ndinga ya Nzambi. Yandi yindulaka kumanisa yo. Keti yo mana sambu yandi buyaka yo ? Beto tala. [Moniteur, lomba

muntu mosi yina kele na Bible kusonga mukanda ya Yeremia. Bana yonso tuba, 'Yo me vila ve ! Yo ikele ! Yo ikele !]

🏠 Malongi ya nene ya leso yai (developpement) na banti ya malongi 4 :

36.1 Mfumu Sedasiasi (beto ta binga yandi Seda na nkufi), yandi yingaka Yoyakini. Yandi salaka kaka mbi. Profete Yeremia songaka nde Nzambi ta pesa bo ndola na maboko ya mfumu ya Babilonia.

📖 Tangila bana : Yeremia 37 :1-9

1 (Profete Yeremia ke tuba.) Nabu, ntotila ya Babilonia, tulaka Seda...kuvanda mfumu ya ntoto ya Yuda. Seda yingaka Yoyakini...

2 Kansi ata yandi Seda, ata bantu na yandi ya kimfumu, bo landaka ve mambu ya Mfumu Nzambi songaka mono kutuba.

6-9...Mfumu Nzambi...tubaka na mono nde :
« Kwenda kusonga mfumu ya Yuda nde basoda ya Babilonia ta vutuka kunwanisa bwala. Bo ta yoka yo tiya... Bo ta kwisa kaka !

❓ Yula bana bakestio.

🏠 Bana sala bageste.

🗣️ Bana yimba ti kina.

36.2 Bo kangaka Yeremia na luvunu na bo. Bo tulaka yandi na prison mosi ya mpasi, kuyindula nde yina ta kanga ndinga ya Nzambi.

📖 Tangila bana : Yeremia 37 :12-16

37 :12 ...Mono yindulaka kubasika na Yeruzalemi kukwenda na ntoto ya Benyamini kubaka bilanga ya fami na mono bikilaka mono.

13 Kansi ntangu mono kumaka na kielo kuna, mfumu ya basoda songaka mono nde : "Nge zola kutina na basoda ya Babilonia ! »

14 Mono tubaka nde : « Ikele ve ! Mono ke tina ve. » Kansi yandi wilaka mono ve. Yandi kangaka mono, ebuna yandi nataka mono na bamfumu na yandi.

15-16 Bo wilaka mono makasi. Bo bulaka

mono, ti tulaka mono na nzo ya bo me kumisa boloko. Mono salaka kuna bilumbu mingi.

? Yula bana bakestio.

🏠 Bana sala bageste.

👤 Bana yimba ti kina.

36.3 Yeremia landaka kusonga mfumu kaka mambu ya Nzambi songaka yandi. Mfumu tulaka Yeremia na lupangu ya prison, ti na nima, na dibulu ya poto-poto.

📖 Tangila bana : Jeremia 37 :17-21, 38 :1-6

17 Kilumbu mosi, Mfumu Seda songaka bantu kunata mono na nzo na yandi. Yandi yulaka mono na kinsweki nde : « Ketu Mfumu Nzambi me tuba kima sambu na mono ? » Mono vutulaka nde : « Ee, Yandi me tuba nde bo ta kanga nge ti nata nge na mfumu ya Babilonia.

20 Ntangu yai mfumu, pardo...kuvutula mono diaka ve na boloko. Kana ve, mono ta fwa kuna. »

21 Yo yina, Mfumu Seda songaka bantu bo tula mono na boloko na kati ya lupangu ya nzo ya kimfumu. Kuna, bo vandaka kupesa mono dimpa mosi konso lumbu...

38 :1 Bantu ya kisalu ya leta, bo waka mambu ya mono vandaka kutubila bantu ...

4 Bo kwendaka kusonga ntotila nde : « Muntu yai fweti fwa, sambu mambu ya yandi ke tuba ke katula kikesa ya basoda na beto... »

6 Yo yina, bo bakaka mono, bo kulumusaka mono na bansinga na kati ya dibulu. Kaka potopoto vandaka na dibulu yango, ebuna mono kotaka na potopoto.

? Yula bana bakestio.

🏠 Bana sala bageste.

👤 Bana yimba ti kina.

36.4 Muntu ya ndombe Ebedi-Meleki, yandi lombaka Mfumu Seda kuwila Yeremia mawa. Yandi katulaka Yeremia na dibulu ya potopoto.

📖 Tangila bana : Jeremia 38 :7-13

7 Kansi Ebedi-Meleki, muntu mosi ya nsi ya Etiopia yina vandaka kusala na nzo ya mfumu, yandi waka nde bo me losa mono na dibulu...

8-9 Ebuna Ebedi-Meleki kwendaka kusonga mfumu nde : « Mfumu, bantu yai me sala mbi. Bo me losa Yeremia na dibulu. Yandi ta fwa na nzala kuna. »

10 ...Ntotila songaka Ebedi-Meleki nde : « Baka bantu tatu, beno kwenda kubasisa Yeremia na dibulu... »

11 Ebedi-Meleki bakaka bantu...bo bakaka bilele ya kufwa-kufwa, bo kulumusaka yo na nsinga na dibulu...

12 Ebedi-Meleki tubaka na mono nde : « Tula bilele yai na nsi ya maboko, ebuna lwata bansinga. »...

13 ebuna bo basisaka mono na dibulu. Bo tulaka mono diaka na boloko ...

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mfumu Seda ti basielo na yandi, bo yindulaka nde kana bo tula mutubi ya Nzambi na boloko to na sika ya mpasi, ata kana bo kufwa yandi, ndinga ya Nzambi ta mana. Kansi ndinga ya Nzambi manaka ve, ata bo salaka konso mutindu. Ndinga ya Nzambi lenda mana ve. Mbote beto wila yo.

👤 Devoir sambu na bakristo :

Beno bakristo, keti beno ke wila Ndinga ya Nzambi ? Ketu beno ke tula ngolo kutanga to kuwa yo konso lumbu ? Ketu beno ke wila yina ya beno kuwa ? Mposo yai, beto sala kuluta ngolo na kuwa yo, ti na kuwila yo.

♥ Verse ya Kulonguka :

Bana sala geste na maboko bonso Bible ya kukangula. Bo tuba verse mbala 2 fraze na fraze na nima ya nge, moniteur. Bo yika bageste ya nkaka ti tuba yo mbala zole diaka. Bo marcher ti kina na cercle kutuba yo mbala zole ya nsuka.

👤 Bankunga ya kwenda nzila mosi ti leso :

Beto Me Wa

O Bible Kele Kieleka

✝ Invitation sambu na bo ya me yamba Yesu ntete ve :

Kana muntu me yamba Yesu ntete ve, wila nki ndinga ya Nzambi ke tuba sambu na nge :

Nzambi salaka bima yonso. Nzambi kele mbote ti santu, ti kwikama yonso. Yandi ke lunga nde beto kusamba Yandi ti kuwila Yandi ti kulemfuka na Yandi.

Kansi beto me sala mpidina ve. Beto me sola nzila ya beto mosi, nzila ya Nzambi ve. Beto me sala masumu—mbi na meso na Yandi. Beto me pesa Yandi mukongo. Beto ke lunga nde Nzambi kulosa beto na bilungi.

Kansi Nzambi zola beto bantu ya mbi. Yandi tindaka Mwana na Yandi ya kitoko, Yesu Kristo, na ntoto yai. Yesu salaka kaka mbote, kansi bantu ya kimpala tulaka Yandi na zulu ya kulunsi. Na lukanu ya Nzambi, Yandi fwaka na sika na beto. Nzambi tulaka mbi na beto yonso na zulu na Yandi. Yandi ndimaka Mwana na Yandi bonso makabu ya menga ya lenda futa mfuka ya masumu yonso na beto.

Yesu bikalaka ve na lufwa. Yandi nungaka lufwa. Yandi telamaka. Yandi tambulaka na ntoto diaka, ti bantu mingi monaka Yandi na nima Yandi me telama na lufwa. Na nima ya bilumbu, Yandi tombukaka na zulu. Bubu yai Yandi ke vandaka na diboko ya kibakala ya Tata Nzambi.

Kana muntu zola guluka, Nzambi lombamba nde yandi balula ntima, yandi ndima Yesu bonso Mvulusi ti Mfumu. Kana Mpeve ya Nzambi ke bula na ntima na nge, kana nge kwikila Yesu na ntima na nge yonso, nge lenda binga zina na Yandi. Yandi kele mfinama sambu na kugulusa nge. Yandi ta lolula masumu na nge. Yandi ta pesa nge ntima ya zola kulanda Yandi. Kana nge zola landa Yesu tii kuna, nge lenda kwisa na nima ya ecodim bubu yai to konso lumbu. Beto ta vanda na kiese na kusadisa nge.

NSUKA YA LESO 36

 Kana ntangu lunga, longuka mikanda ya Bible . Bangindu na p. 49.



Mfumu Seda tulaka Profete Yeremia na dibulu ya potopoto sambu yandi zolaka kubuya ndinga ya Nzambi-ya Yeremia tubaka. Kansi muntu-ndombe zina ya Ebed-Meleki katulaka yandi.

***(Nzambi), Nge ke salaka
mpi mambu mutindu Nge
ke tubaka tii kuna...***

Bankunga 119 :90a

Leso 37. Ndola ya nsuka kubwaka. Yeruzalemi panzanaka.

Leso yai ke monika na 2 Bantotila 25.

I. PREPARATION SAMBU NA MONITEUR-

🎯 Kikuma ya Leso :

Bana ta bakisa nde beto yonso dezia me sala mbi na meso ya Nzambi. Yo yina, bo ta balula ntima. Bo ta kwenda nswalu na Yesu Mvulusi.

💖 Verse ya Kulonguka : Beto baka diaka--

Muntu ya mbi kubika nzila na yandi ya mbi. Muntu ya nku kubika bangindu na yandi ya nku.

Bo vutuka na Mfumu Nzambi sambu Yandi kuwila bo mawa.

Bo vutuka na Nzambi na beto. Yandi ke lembaka ve na kulolula. Yezaya 55 :7

👤 Bankunga ya kwenda nzila mosi ti leso :

Kwisa na Yesu Kristo

Mawa, Mawa, Kuvanda Mwana-Satana

II. REVISIO

👤 Kuyindula diaka baleso me luta :

Beto me yindula bamfumu mingi. Na nord partie ya ntoto ya Nzambi pesaka bana ya Yakobo, na Israele, kuna bamfumu yonso kaka mbi. Nzambi tindilaka bo bapropete bonso Elia ti Elisa kupesa bo ndinga na Yandi, kubinga bo kubalula ntima. Kansi bo balulaka ve. Na nsuka Nzambi pesaka bo ndola. Yandi pesaka capital na bo Samaria na bambeni na bo. Bo kumaka bampika na nsi ya nkaka. Kimfumu kufwaka.

Bantu na sud, na Kimfumu ya Yuda, bo monaka makambu yai yonso ya bwilaka bampangi na bo. Na kati na bo, ndambu bamfumu vutukaka na Nzambi, ti Nzambi wilaka bo mawa. Kansi mingi na kati na bo landaka kaka mbi. Bo sosaka Nzambi ve. Bo buyaka ndinga ya Nzambi. Bo pesaka mpasi na bapropete yina ya Nzambi tindaka kusonga bo ndinga na Yandi. Nzambi tindilaka bo ndambu ndola kupesa bo atasio ! Kansi bo buyaka kubalula ntima. Mawa, mawa, mawa na bo !

III. KULONGA LESO YAI

➡ Kuyantika :

Beto me tuba nde nani vandaka mfumu ya nsuka ? (Ee, Mfumu Seda.) Kuwa mpila ndola ya nsuka bwilaka bo.

🏠 Malongi ya nene ya leso yai (developpement) na banti ya malongi 4 :

37.1 Nabu, Mfumu ya Babilone, vutukaka.

Basoda na yandi ziungaka Yeruzalemi mvula mosi ti ndambu, tii madia kumanaka na kati ya ville.

📖 Tangila bana : 2 Bantotila 25 :1-2

1 Yo yina, Nabu kwisaka kunwanisa Yeruzalemi bitumba...Basoda tungaka camp na bo penepene na bwala. Bo ziungisaka yo...

2 Bo bikaka kuziunga Yeruzalemi tii kuna mvula mosi ti demi.

? Yula bana bakestio.

🏠 Bana sala bageste.

👤 Bana yimba ti kina.

37.2 Ntangu madia manaka na bwala, basoda ya Yeruzalemi tinaka. Ebuna basoda ya Babilone bedisaka bo.

📖 Tangila bana : 2 Bantotila 25 :3-4

3 Na mvula yango ...nzala kotaka mpila ve na bwala. Bantu vandaka na ata kima ya kudia ve.

4 Ntangu yai, basoda ya Babilonia tobulaka bibaka ya bwala. Basoda ya Yuda tinaka na kati ya mpimpa, ata bantu ya Babilonia vandaka me ziunga bwala...

? Yula bana bakestio.

🏠 Bana sala bageste.

👤 Bana yimba ti kina.

37.3 Mfumu ya Babilonia zengaka zuzema ya ngolo-ngolo na Mfumu Seda.

📖 Tangila bana : 2 Bantotila 25 :5-7

5-6 Kansi basoda ya Babilonia landaka Mfumu Seda. Bo kangaka yandi na nseke. Basoda na yandi yonso tinaka yandi. Bo nataka yandi na Mfumu Nabu, ebuna yandi sambisaka yandi.

7 Bo fwaka bana ya Seda na meso na yandi mosi. Yandi mosi, bo tobulaka yandi meso. Bo kangisaka yandi miniololo, ebuna bo nataka yandi na nsi ya Babilonia. (Mawa na mawa !)

? Yula bana bakestio.

🏠 Bana sala bageste.

👤 Bana yimba ti kina nkunga:

Mawa, Mawa, Kuvanda Mwana-Satana

37.4 Bo fwaka Yeruzalemi ti Nzo-Nzambi. Bo fwaka bantu kukonda mawa (2 Bansangu 36 :17), to bo kumisaka bo bampika. Bo bikisaka kaka bansukami na ntoto ya vandaka Yuda.

📖 Tangila bana : 2 Bantotila 25 :9-12

9 Mfumu Nabu tulaka Nzo-Nzambi tiya, ti nzo ya mfumu, ti banzo ya bantu yonso ya nene ya Yeruzalemi.

10 Basoda na yandi bwisaka mpi lupangu ya bwala.

11 Bo bakaka bantu yonso yina bikalaka na bwala, bo nataka bo na kimpika kuna na nsi ya Babilonia.

12 Kansi yandi bikisaka kaka bo ya vandaka bansukami mpenza. Yandi pesaka bo kisalu ya bilanga ya vinu ti ya kubundula ntoto.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

O mawa na Mfumu Seda ! Mambu ya nsuka yandi monaka—kumona lufwa ya mpasi ya bana na yandi. Kukuma mpika kukonda meso. Aii ! Mawa ! Mbote yandi balulaka ntima, kansi yandi zolaka ve.

O mawa na bwala Yeruzalemi ! Bantu na nge me fwa na nzala ti na mbele. Bambeni me fwa nge yonso ! Nzo-Nzambi ya kitoko na nge, bo me fwaka yo. O bantu ya Yeruzalemi, O bantu ya Yuda, mbote beno balulaka ntima ! Mbote beno sosaka Nzambi ! Yandi zolaka kulolula beno. Kansi beno buyaka. O, mawa ! Ntangu yai, Nzambi me kangula nzila nde bambeni kumanisa nge na mpasi ti na nsoni !

👤 Devoir sambu na bakristo :

Beto bakristo kele bantu ya me balula ntima na Yesu. Beto vutuka ve na nzila ya masumu ya ke suka na lufwa. Beto benda bampangi makutu, bo zaba mpila kukwisa na Yesu.

❤ Verse ya Kulonguka : Beto baka diaka—

Bana tuba verse mbala 2 fraze na fraze na nima ya nge, moniteur. Na nima, babakala tuba yo, ti konso mbala bankento kuwa ndinga 'kuvutuka', bo telama ti repeter yo. Na mbala ya 4, bankento tuba verse, ti konso ntangu babakala kuwa ndinga 'kubika,' bo telama ti repeter yo. Na mbala zole ya nsuka, bankento ti babakala sala competisio kutuba yo mbote.

👤 Nkunga ya kwenda nzila mosi ti leso :

Mawa, Mawa, Kuvanda Mwana-Satana

✝ Invitation sambu na bo ya me yamba Yesu ntete ve :

Mbala ya nkaka nge kele bonso Mfumu Sedesiasi. Nge me wa ndinga ya Nzambi mingi, kansi nge me balula ntima ntete ve. Nge ke landa kuzinga na mpila ya nge ya mbi. O, mpangi, balula ntima ! Binga Yesu kulolula nge ti kuchanger ntima na nge, kutwadisa nge na nzila ya kieleka.

Kana ve, zaba nde ndola mosi ya ngolo ke kinga nge. Nsuka ya nzila ya masumu kele lufwa, kele bilungi. Kele kuvanda mvu ya mvu na sika ya kele ntama ti Nzambi. Sika yina, Nzambi salaka yo sambu na bantu ve. Yandi salaka yo sambu na Satana ti bawanzio na yandi ya mbi. Kansi kana nge buya Yesu Kristo, Mwana ya Nzambi, kana nge balula ntima ve, kieleka nge kele kulanda nzila ya Satana. Nsuka na yandi ta vanda zanga ya tiya. Nge zola ve kulanda yandi tii kuna.

Nsuka ya nzila ya Yesu kele moyo mvu ya mvu ti Tata Nzambi na sika ya kitoko, ya mbote, mpila kutuba yo kele ve.

Nge ta landa nani ? Kana nge ke na mfunu ya lusadis na mambu yai, beto kele awa na nima ya ecodim konso mposo sambu na kusadisa nge.

NSUKA YA LESO 37

📖 Kana ntangu lunga, longuka mikanda ya Bible. Bangindu na p. 49.




Leso 37

Mfumu Nebu ya Babilonia pesaka Mfumu Seda ndola ya ngolo. Yandi fwaka bana na yandi, yandi meso na yandi mosi, ti yandi kumisaka yandi mpika na Babilonia. Mawa na bo ya landa Nzambi ve!

***Muntu ya mbi **kubika** nzila
na yandi ya mbi.***

***Muntu ya nku **kubika**
bangindu na yandi ya nku.***



***Bo **vutuka** na Mfumu
Nzambi. Yandi ta wila bo
mawa.***

***Bo **vutuka** na Nzambi na
beto. Yandi ke lembaka ve
na kulolula. Yezaya 55 :7***

Leso 38. Profete Yeremia dilaka kubwa ya Yeruzalemi.

Leso yai ke katuka na bitini ya Mukanda ya Mawa.

I. PREPARATION SAMBU NA MONITEUR-

🎯 Kikuma ya Leso :

Bana ta bambuka nde Nzambi kele juste ti mbote, ata bo me mona ntangu ya mpasi. Bo ta tula Yandi ntima ata na ntangu yina.

♥ Verse ya Kulonguka :

Kana Nzambi me fwa beto ve, kaka nlemvo na Yandi, sambu luzolo na Yandi ke manaka ve.
Mawa 3 :22

🗣️ Nkunga ya kwenda nzila mosi ti leso :

Nani Ke Ngolo ? (Kwikama, Mbote)

II. REVISIO

👉 Kuyindula diaka baleso me luta :

Nzambi me pesa bantu ya Yuda ntangu ya mpasi, ya mawa, ya kudila, ya ndola. Kansi Nzambi me manisa ve ti bantu ya Yuda. Bambuka, Nzambi bingaka tata na bo Abrahama sambu na kusakumuna bantu ya bansi yonso. Beto me landa Yandi ve, ti Yandi me kupesa bo ndola ya ngolo.

Kansi bambuka nge, baprofete ya songaka nde mambu yina ya salama, bo mpi tubaka nde Mesia ta kwisa. Bo tubaka nde ntangu ta kwisa nde Mesia ta yala beto yonso. Na lumbu yina, kiese ta vanda mingi. Bantu ya Yuda vandaka kudila ngolo ntangu yina, kansi Nzambi me bika bo ve.

III. KULONGA LESO YAI

➡ Kuyantika :

Beto yimba na ntangu ya kiese, kansi beto yimba mpi na ntangu ya mawa, bonso na mafwa. Profete Yeremia, ntima na yandi me fuluka na mawa sambu na kubwa ya bwala na yandi, bwala ya Nzambi. Yandi tulaka mawa na yandi na poesi ya bantu vandaka kuyimba. Yo kele mukanda ya Mawa na Bible na beto, ti yo landa kaka na nima ya mukanda ya Yeremia.

🏠 Malongi ya nene ya leso yai (developpement) na banti ya malongi 4 :

38.1 Profete Yermie sonikaka mukanda ya poesi ya beto binga 'Mawa' sambu na kudila kubwa ya Yeruzalemi.

📖 Tangila bana : Bitini ya Mawa 1

Mawa 1 :1 A, bwala Yeruzalemi me kuma bwala ya mpamba ! Bwala ya kimfumu me kuma bwaka ya kimpika !

1 :8 Yeruzalemi me sala masumu ya mbi mpenza, yo yina yandi me kuma nzanzi...

1 :18 Mfumu Nzambi ke na raison kusala mutindu yai, sambu Yeruzalemi lemfukaka na Yandi ve.

❓ Yula bana bakestio.

🏠 Bana sala bageste.

🗣️ Bana yimba ti kina.

38.2 Yeremia bambukisaka bantu nde kubwa ya bwala ti mpasi yonso, yo kwisaka sambu bo zolaka kubika masumu na bo ve.

📖 Tangila bana : Mawa 1 :2

1 :2 ...Mfumu Nzambi me bika Yeruzalemi kumona mpasi sambu na masumu na yandi mingi...

❓ Yula bana bakestio.

🏠 Bana sala bageste.

🗣️ Bana yimba ti kina.

38.3 Yeremia dilaka mingi nzala ya bantu ntangu basoda ya Babilonia vandaka kuziunga bwala.

📖 Tangila bana : Bitini ya Mawa 1, 2 ti 5

1 :11 Bantu ya Yeruzalemi ke dila ngolo ntangu bo ke sosa bima ya kudila. Bo ke teka bimvwama na bo sambu na madia, sambu na kuzinga.

2 :11-12 Bana ti bana ya fioti ke fwa ngambu na balabala. Bo ke didila bamama na bo nde : « Wapi madia ? Wapi masa ? »...malembe-malembe bo ke fwa na maboko ya bamama na bo.

5 :10 Nzala me yoka beto bonso maladi...

? Yula bana bakestio.

🏠 Bana sala bageste.

👤 Bana yimba ti kina.

38.4 Na mawa, Yeremia bendaka bantu kubambuka mambote ya Nzambi ti kuvutuka na Yandi.

📖 Tangila bana : Bitini ya Mawa 3

3 :21-22 Kansi kima mosi mpamba ya mono ke yindula na ntima, yo yai : Kana Nzambi me fwa beto ve, kaka nlemvo na Yandi, sambu luzolo na Yandi ke manaka ve.

3 :40 Beto tala mbote-mbote banzila na beto, ebuna beto vutuka na Mfumu Nzambi.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Profete Yeremie dilaka kubwa ya Yeruzalemi ngolo. Kansi Yandi fundaka Nzambi ve. Yandi bakisaka nde kubwa yina vandaka ndola ya masumu na bo. Yandi mpi zabaka nde, ata Nzambi me pesa bo ndola ya mpasi, Yandi me vila bo ve. Bo fweti bambuka mambote yonso na Yandi. Bo vutuka na Yandi sambu Yandi sakumuna bo diaka.



Devoir sambu na bakristo :

Mukristo, keti nge ke luta na ntangu ya mpasi na luzingu na nge ? Bambuka mambote ya Nzambi. Tula ntima na Yandi. Bampasi ke vandaka ve tii kuna sambu na beto bakristo.



Verse ya Kulonguka :

Bana tuba verse mbala zole fraze na fraze na nima ya nge, moniteur. Na nima, bo tuba yo mbala zole, fraze ya ntete na ndinga ti bageste ya mawa, ti fraze ya zole na ndinga ti bageste ya kiese. Na nsuka, bana ya fioti ti bana ya me yela songa musapi na ndambu ya nkaka kutuba yo mbala zole diaka.



Nkunga ya kwenda nzila mosi ti leso :

Nani Ke Ngolo ? (Kwikama, Mbote)

✝ Invitation sambu na bo ya me yamba Yesu ntete ve :

Kansi, kana nge me yamba Yesu ntete ve, nge kele na raison ya kudila. Nge ke pesa Nzambi mukongo. Kintwadi kele ve na kati ya nge ti Nzambi. Yandi zola nge mingi, kansi Yandi kele na nge makasi. Kana nge kuma na nsuka ya moyo na nge, nge ta mona ve kiese ya Nzambi. Yandi ta yamba nge ve na bwala na Yandi.

Yandi lenda ve yamba nge, sambu nge kele nkwa-masumu. Masumu lenda kota ve na bwala na Yandi. Masumu ta bebisa bwala na Yandi, kansi yina lenda salama ve.


Nzambi me sala mpila ya Yandi lenda lolula nge ti katula masumu na nge yonso. Nzila yina kele kuyamba Yesu Kristo, Mwana na Yandi ya mvu ya mvu. Mpidina, lufwa ya Yesu fwaka na zulu ya kulunsi ti kutelama na Yandi, Nzambi ta tanga yo sambu na nge. Yandi ta sukula nge. Yandi ta pesa nge ntima ya mpa, ntima ya zola lemfuka na Yandi. Lumbu mosi, kana bilumbu na nge na ntoto yai kulunga, Yandi ta yamba nge na kiese na bwala na Yandi. O, kana nge kele ve sur, sur, sur nde nge me yamba Yesu, binga Yandi bubu yai. Kana muntu sosa lusadisya na mambu yina, yandi lenda bikala na nima ya ecodim sambu beto tendula yandi mbote-mbote.

NSUKA YA LESO 38

📖 Kana ntangu lunga, longuka mikanda ya Bible. Bangindu na p. 49.

Leso 38

***Kana
Nzambi
me fwa
beto ve,
kaka
nlemvo
na Yandi,
sambu
luzolo na Yandi
ke manaka ve.***



Profete Yeremia dilaka
kubwa ya Yeruzalemi
na mukanda ya Mawa.

Mawa 3 :22

Leso 39 Leso ya Revisio

Ntoto na Israele:

Songa karte geografika ya ntoto ya na p. 49. Yai ntoto Nzambi pesaka bantu na Yandi Israele.

Bakestio yai yonso keke sambu na ntoto yina. Yo vutuka tii na baleso ya ntama.

Nge lenda pesa bapoint kana bana pesa mvutu ya mbote ti sala yo competisio. Pesa bo enkuragema ya nene konso ntangu bo pesa mvutu ya mbote.

1. Nani muntu ya ntete ya Nzambi silaka kupesa ntoto yai ? Abrahami ? to Yobi ?
✓ Abrahami.
2. Nani tambulaka na ntoto yai ti zingaka na yo, ata yo vandaka ntoto ya bantu ya nkaka ntangu yina ? Moize, Aroni ti Miriami ? to Abrahami, Isaki ti Yakobi ?
✓ Abrahami, Isaki ti Yakobi.
3. Sambu na nki Yakobi bikisaka ntoto yai ti kwendaka kuzinga na Ezipte ? Yandi zolaka ntoto yina ve ? to Ntangu ya nzala kotaka na ntoto yina ?
✓ Ntangu ya nzala kotaka na ntoto yina.
4. Nki mambu ya mpasi bwilaka bantu ya Israele na nsi ya Ezipte ? Bo kumaka bampika ? to bana na bo yonso kufwaka ?
✓ Bo kumaka bampika.
5. Nzambi bingaka nani kubasisa bo na kimpika ya Ezipte, mpi kutwadisa bo na ntoto ya Yandi silaka bo ? Adami ? to Moize ?
✓ Moize.
6. Bo lutaka na nseke ya zelo na zelo, ti bo kumaka na lupangu ya ntoto ya Nzambi silaka bo. Sambu na nki bo kotaka ve ? Bo yonso fwaka pana ? to Bo waka boma, yo yina bo buyaka kukota ?
✓ Bo waka boma, yo yina bo buyaka kukota.
7. Sambu bo buyaka kukota, bo vutukaka na nseke ya zelo na zelo. Kuna bo tambula bamvula ikwa ?
Mvula mosi ? to Bamvula 40 ?

8. Na nima ya bamvula 40, nani twadisaka bo kukota na ntoto ya Nzambi silaka ? Yozue ? to Isaki ?
✓ Yozue.
9. Kukota ntoto yina, bo fweti sabuka nki nzadi ? Nzadi Congo ? to Nzadi Yordani ?
✓ Nzadi Yordani.
10. Bwala ya ntete ya bo bakaka na ntoto yina vandaka Yeriko. Nki kimpa salamaka kuna ? Bwala dindaka na kati ya masa ? to Bibaka ya bwala kubwaka yo mosi ?
✓ Bibaka ya bwala kubwaka yo mosi.
11. Nzambi pesaka Israele ntoto yina sambu bantu ya vandaka kuzinga kuna vandaka mbi mingi. Bantu yina nani ? Bantu ya France ? to Bantu ya Kanana ?
✓ Bantu ya Kanana.
12. Na nima bo me bedisa bantu mingi ya ntoto yina, bo kabisaka yo na bandambu 12. Bo pesaka bandambu yai na banani ? Batribu 12 ya Israele ? to Bana 12 ya Kalebi ?
✓ Batribu 12 ya Israele.
13. Sambu na nki Nzambi songaka bo kumanisa bantu ya vandaka kuzinga kuna ntete--Sambu Yandi gangaka bantu yina ve ? to Sambu bantu yina vandaka mbi ya kuluta ?
✓ Sambu bantu yina vandaka mbi ya kuluta.
14. Bantu ya Israele manisaka bantu yina yonso ve, yo yina bantu yina yantikaka kuyangisa bo. Ntangu yina, Nzambi bingaka banani sambu na kugulusa bo ? Bazuzi ? to Bandwenga ?
✓ Bazuzi
15. Bazuzi zole vandaka—Loti ti nkento na yandi ? to Samsoni ti Gedeoni ?
✓ Samsoni ti Gedeoni.
16. Na nima ya bazuze, sambu na nki Nzambi pesaka bo bamfumu ? Sambu yo vandaka

luzolo na Yandi ? to Sambu yo vandaka luzolo na bo mosi ?

✓ Sambu yo vandaka luzolo na bo mosi.

17. Nani vandaka mfumu ya ntete na nsi na bo ? Yokabedi ? to Saule ?

✓ Mfumu Saule.

18. Nani kumaka mfumu na nima ya Saule ti kumisaka kimfumu nene mingi ? Mfumu Yoashi ? to Mfumu Davidi ?

✓ Mfumu Davidi.

19. Nani Mfumu kuluta mayele na bamfumu yonso (apart na Yesu) ? Mfumu Akabi ? to Mfumu Salomoni ?

✓ Mfumu Salomoni.

20. Ata Solomoni vandaka mayele mingi, yandi salaka buzoba na mambu mosi. Nki buzoba na yandi ? Mpila yandi salaka mvita ? to Bankento ?

✓ Bankento.

21. Na bilumbu ya Rehoboami, Kimfumu kabanaka. Sambu na nki yo kabanaka ? Sambu mfumu buyaka conseil ya mbote ? to Sambu mfumu kwendaka na nsi ya nkaka ?

✓ Sambu mfumu buyaka conseil ya mbote.

22. Na nki kimfumu bamfumu vandaka kaka mbi, mbi, mbi ? Kimfumu ya Israele ? to Kimfumu ya Yuda ?

✓ Kimfumu ya Israele. (Songa yo na karte.)

23. Nani profete ya Nzambi ya tulaka masa na zulu na makabu, ebuna yandi bingaka tiya kukatuka na zulu kuzika yo ? Profete Amosi ? To Profete Elia ?

✓ Profete Elia.

24. Nani mfumu ya kuluta mbi, ti nkento na yandi mpi kuluta mbi ? Davidi ti Mikale ? to Akabi ti Yezebele ?

✓ Akabi ti Yezebele.

25. Nki Kimfumu kubwaka ntete, ti nataka bantu kuvanda bampika na nsi ya Asiria ?

Kimfumu ya Yuda ? to Kimfumu ya Israele ?

✓ Kimfumu ya Israele.

26. Nki mfumu lombaka yandi nde yandi kufwa ve ? Nzambi yikaka yandi bamvula 15, kansi yandi sadilaka bamvula yina na mpila ya lungaka ve.

Nani ? Mfumu Davidi ? to Ezekiasi ?

✓ Mfumu Ezekiasi.

27. Nki mfumu ya Yuda pasulaka ndinga ya Nzambi ti tulaka yo tiya ? Mfumu Tobiasi ? To Yoyakimi ?

✓ Yoyakimi.

28. Mfumu tulaka nki profete na dibulu ya potopoto ? Elia ? to Yereimia ?

✓ Yereimia.

29. Ntangu Mfumu Nebu ya Babilonia kufwaka bwala ya Yeruzalemi, yandi salaka nki mambu ya mbi na mfumu ya Kimfumu ya Yuda ? Yandi sekaka yandi ? to Yandi botulaka meso na yandi ?

✓ Yandi botulaka meso na yandi.

30. Profete Yereimia dilaka kubwa ya Yeruzalemi, ebuna yandi sonikaka kudila na yandi na nki mukanda ya Bible ? Kuyantika ? to Mawa ?

✓ Mawa.

Tendula—Nzambi silaka bantu na Yandi ntoto ya Israele. Yandi pesaka yo, kansi Yandi songaka nde bo ta zinga mbote kuna kaka kana bo lemfuka na Yandi.

Bo lemfukaka ve mbala na mbala. Ata Nzambi wilaka bo mawa mingi, ntangu yai, Yandi me katula bo na nsi ya Yandi silaka bo. Bo me kuma bampika na bansi ya nkaka.

Kansi Nzambi me vila bo ve. Na bamposo ke kwisa, beto ta mona mpila Yandi sadisaka bo sika bo vandaka na kimpika na nsi ya Babilonia.

KULONGA MIKANDA YA BIBLE

Atasio, moniteur ! Mbote kulonga mikanda ya Bible ndambu-ndambu, malembe-malembe. Yo yina beto me tuba nde na nima ya konso leso, kana nge me manisa malongi yonso, nge lenda sadila ntangu yina kulonga ndambu mikanda ya Bible ti ordre na yo.

Kana ndambu ya bana kwisa na ntwala, nge lenda sadila mpi ntangu yina. Kana ndambu bana bikala kusolula nzila ya mpulusu, ntangu moniteur mosi ke solula ti bo, moniteur ya nkaka lenda benda bana ya nkaka ndambu ntama ti sadila ntangu yina kuyika mpi ndambu malongi sambu na mikanda ya Bible.

Awa kele ndambu bangindu sambu na kusadila mosi-mosi kulonga bana mikanda ya Bible:

Mikanda ya histoire ti ya baprofete :

Na baleso yai, beto manisa mikanda ya histoire ya Israele na ntoto Nzambi pesaka bo, tii na ntangu ya bo kwendaka na kimpika na Babilonia. Mikanda ya histoire yina, yo yai :

Yozue

Bazue

Ruti

1 ti 2 Samuele

1 ti 2 Bantotila

1 ti 2 Bansangu

=====KIMPIKA NA BABILONIA

Yo ke bikala mikanda ya nkaka ya histoire ya ta songa histoire na bo na ntangu bo vutuka na nima ya kimpika. Yo yai :

Ezra Nehemia Estere

Baprofete mpi vandaka kusonika mikanda na bo na kati ya ntangu yai yonso.

Mikanda ya poesi

Bo sonikaka mikanda ya poesi na bantangu ya nkaka. Ya ntete, mukanda ya Yobi, ke tadila ntangu bonso ya Abrahami. Mukanda ya Bankunga, bo yantikaka kusonika yo na ntangu ya Mfumu ya nene Davidi. Mikanda ya Bingana, Longi, ti Kuluta Kitoko, Mfumu Salomo sonikaka yo.

Mukanda ya Mawa (leso ya nsuka ya baleso yai) ikele poesi. Kansi mbala mingi beto tula yo na kati ya baprofete, kaka na nima ya musoniki na yo, Profete Yeremia.

Yimba Nkunga, Mikanda ya Moize :

Mikanda ya Moize, Moize, Moize,
Mikanda ya Moize—Bansiku-Nzambi !
Kuyantika, Kubasika, e Levi, Kutanga
Ye nsuka ke Kulonga, Mikanda ya Moize !

Yimba Nkunga, Mikanda ya Histoire :

Mikanda ya histoire, histoire, histoire,
Mikanda ya histoire—Histoire ya Bayuda !
Yozue, Bazuzi, ye Ruti, ti BaSamuele,
Ye Bantotila, Basangu, ye Esdrasi
Nehemia, ye Estere, Mfumu-Nkento
Yai yonso kumi na zole mikanda ya histoire.

Yimba Nkunga, Mikanda ya Poesi :

Mikanda ya poesie, poesie, poesie
Mikanda ya poesie, bankunga ya Nzambi
Yobi ya kangaka ntima, Bankunga ya Davidi,
Bingana ya mayele, 'Buna Longi ye Kitoko.
Yai yonso mikanda tanu, mikanda ya poesie.

Tuba mikanda na chaine :

Moniteur, nge yantika kutuba mukanda mosi ya Bible ti nge songa mwana diboko. Yandi fweti tuba mukanda ya landa yo. Na nima, mwana na droite na yandi tuba mukanda mosi, ti mwana na droite na yandi tuba ya nkaka, etc. tii beno me manisa yonso.

Droite, Gauche

Sala bonso 'Tuba mikanda na chaine', kansi sola mwana mosi kukwisa na ntwala. Mbala na mbala yandi ta binga, 'Droite' to 'Gauche'. Bana yantika na droite, kansi kana yandi binga 'Gauche,' bo balula ti mwana na gauche fweti tuba mukanda. Bo sala mpidina tii yandi bing 'droite' diaka. Ntangu yina, bo vutuka na droite.

Sola karte mosi :

Sonika bazina ya mikanda ya Bible na karte to bitini ya papier, bapapier yonso ya kumonika kiteso mosi. Tula yo face na nsi. Konso mwana fweti sola karte mosi. Yandi tanga yo ti songa mambu mosi sambu na mukanda yina. Yandi lenda songa yo kele nki sorte ya mukanda (histoire, poesi, etc.), to yandi lenda songa nani sonikaka yo, to mambu mosi ya yo ke songa, to muntu ya nene na kati na yo.

Songa karte kompetisio :

Kana bana me zaba kusala 'Sola karte' mbote, kumisa yo kompetisio. Zenga bana na bandambu zole. Ekiye ya ntete balula karte na bo ti yantika kutuba bima sambu na yo. Moniteur, tanga mambu yina bo tuba sambu na yo. Yo kuma bapoint na bo. Kana bo tuba kima mosi ya kifu, to kana bo zaba kutuba kima diaka ve, tour na bo suka ti ekiye ya nkaka sala. Ekiye ya baka bapoint ya kuluta kele shampio.

Nki mukanda ?

Moniteur, tanga mambu mosi ke tadila mukanda, ti bana meka kuzaba yo kele nki mukanda. Bana lenda sala yo na kimvuka to na ekiye bonso kompetisio. Moniteur lenda yika bakestio ya nkaka.

- Mono kele poesi ya kudila. Profete Yeremia sonikaka mono. Mono nki mukanda ? (Mawa)
- Mono ke songa nsilulu ya Nzambi pesaka na Abrahama nde Yandi ta pesa bana na yandi ntoto. Mono nki mukanda ? (Kuyantika)
- Mono kele mukanda kaka na ntwala bo yantikaka kutuba bantu mfumu. Mono nki mukanda ? (Bazuze)
- Mono kele mukanda ke songa mutindu Nzambi katulaka bantu na Yandi na kimpika na Ezipte. Mono nki mukanda ? (Kubasika)
- Mono kele mukanda ke songa luyantiku ya bamfumu. Mono nki mukanda ? (1 Samuele)
- Mono kele mukanda ke songa nsuka ya kimfumu ya Yuda. Mono nki mukanda ? (2 Bantotila to 2 Bansangu.)
- Mono ke mukanda ya tuba bima mingi ya mayele. Mono nki mukanda ? (Bingana)
- Mono kele mukanda ke tuba Kimfumu ya Kukabana. Mono nki mukanda ? (2 Bantotila to 2 Bansangu)
- Mono ke songa ntangu ya Abrahama, kansi mono Kuyantika ve. Mono nki mukanda ? (Yobi)
- Profete ya sonikaka mono songaka nde Mesia ta butuka na Betelemi. Mono nki mukanda ? (Mishe) Etc.

Histoire Favori :

Moniteur songa mukanda mosi ya nene ya beto me longuka. Bana tuba bahistoire na bo favori na kati na yo. (Bo tuba histoire ya mvimba ve-kaka titre to ngindu na yo.) Mbandu :

Moniteur : 2 Bantotila Mwana : Mwana Yosias kuma

mfumu

Moniteur : Yonasi Mwana : Bantu ya Ninive balula ntima

Moniteur : Kubasika Mwana : Nzambi kangula Mer Rouge sambu bo sabuka

Moniteur : 2 Samuele Mwana : Davidi kele mfumu

Linya ya Ntangu :

Tendula balinya ya ntangu ndambu-ndambu na bana. Songa mpila yo ke songa ordre ya mambu ya salamaka ti date approximatif na yo.

Na nima, mwana mosi tendula ndambu na yo.

Na nsuka, mwana mosi kuyufula bana ya nkaka kestio ti bo fweti pesa mvutu. (Bo tala karte kupesa mvutu.)

Nki Salamaka Ntete ?

Moniteur songa mambu zole ya me salama na baleso beto me longuka. Bana songa nki salamaka ntete.

Bambandu :

Kimfumu kabanaka, ti Salomo vandaka mfumu ('Salomo vandaka mfumu' salamaka ntete.)

Kimfumu ya Israele fwaka, ti Kimfumu ya Yuda fwaka. ('Kimfumu ya Israele fwaka' salamaka ntete.)

Mfumu Seda yalaka, ti Mfumu Yoziyasi yalaka. (Mfumu Yoziyasi yalaka ntete, sambu Seda vandaka mfumu ya nsuka.)

Nzambi katulaka bantu ya Israele na kimpika na Ezipte, ti Nzambi pesaka bo ntoto ya Kanana. ('Nzambi katulaka bantu ya Israele na kimpika na Ezipte' salamaka ntete.)

Profete Yeremia dilaka kubwa ya Yeruzalemi, ti Profete Elia kwendaka na zulu na shariote ya tiya. ('Profete Elia kwendaka na zulu na shariote' salamaka ntete.) Etc.

Kutuba Mikanda na Ritima :

Moniteur tuba mikanda mosi-mosi na mpila ya ritima, ti bana tuba mpidina na nima na nge.

Karte ya Honore :

Sonika bazina ya bana yonso ya lenda tuba mikanda ya Bible na ordre, bo mosi. Tula yo na sika ya bantu lenda mona yo sambu na kupesa bo honore.

Bankunga ya beto sadila na mukanda yai:

(NB, Moniteur ! Kana nkunga kele na kidimbu 📢 na ntwala ya titre, yo ke songa nde nge lenda kuwa yo na YouTube kanal Ecodim Congo, to na site ya MCE, www.ecodimafrigue.com .)

Aleluya, Imene !

Aleluya, Imene !
Mono kwikila Yesu.
Mono me gulusa na menga ya Yesu.
(Repete yonso mbala zole)

📢 Banzambi ya Nkaka

Banzaaa-mbi ya nkaka
Bantu me sala yo
Nge kaka ke Nzambi
Ya salaka beto ! (O Yesu) *[repete yonso]*

Beto Mene Kutana

Beto yonso me kwisa
Beto mene kutana 3x
Kusambila
O-o sambila Mfumu na beto !

Baverse ya nkaka—tula ndinga yai na sika ya 'kusambila' :

Kukembila
Kufukama
Kuzitisa

📢 Beto Me Wa

Beto me wa Ndinga-Nzambi,
Bika yo kota mbote.
Beto me wa Ndinga-Nzambi,
Bika yo kota mbote.
Bika beto bakisa,
Bika beto lemfuka.
Beto me wa Ndinga-Nzambi,
Bika yo kota mbote.

📢 Bu Basantu Kota Zulu

Bu basantu kota zulu
Bu basantu kota zulu
Mono zola vanda na kati
Bu basantu kota zulu

Bu basantu mona Yesu
Bu basantu mona Yesu

Mono zola vanda na kati
Bu basantu mona Yesu

Mono ta kota na zulu
Sambu mo' me landa Yesu
Mono fweti vanda na kati
Bu basantu kota zulu.

Keti Nge Me Yilama Mbote ?

Keti nge me yilama
Kumona Yesu ?
Nge mene butamaka
Na Menga na Yandi ?
Ntima na nge ke mbote—
Kukonda masumu ?
Keti nge me yilama
Kumona Yesu ?

Kumisa Nzambi

Kumisa Nzambi na kiese (3x)
Aleluya ! Na kiese !

Kuwa Bible

Kuwa Bible
Tanga Bible
'Buna Nge
Ta mona
Nzila mbote mingi
Nzila mbote mingi
Ye ngangu
Ye ngangu

Kwisa na Yesu Kristo

Kwisa na Yesu Kristo (3X)
Nge ata guluka !

Menga n'Yandi ta lunga (3X)
Kukatula mbi !

📢 Lomba na Nzambi

Beto fweti lombila
Na Nzambi, Yandi kaka
Ata muntu mosi ve
Ya nkaka lenda sadisa !

MVUTU:

Lomba na Nzambi !
Na Nzambi kaka
Lomba na Nzambi
Na zina ya Yesu !

Nzambi zola sadisa
Bantu na Yandi mpenza
Yandi mene silaka
Yandi ata sadisa

Masumu Ke Bebisa

Masumu ke bebisa
Nata kaka lufwa
Yo tunga luzingu ve, ve, ve
Mono zola yo ve.
Masumu kele mbeni
Nata kaka mawa
Yo tunga luzingu ve, ve, ve
Mono zola yo ve !

Mawa, Mawa kuvanda mwana-Satana

Mawa, mawa, kuvanda mwana-Satana
(repeter)
O, walewale, O, walewale-e !
Kiese, kiese, kuvanda mwana ya Nzambi
(repeter)
O, wale-e, O, wale-e !

Mazono, Bubu, Mvu ya Mvu

Mazono, bubu mvu ya mvu,
Yesu mutindu mosi !
Bantu yonso kulenda changer,
kansi Yesu ve.
Nkembo kwa yandi ! Nkembo kwa Yandi !
Bantu yonso kulenda changer,
kansi Yesu ve.

Mono Me Sila Kulanda Yesu

Mono me sila kulanda Yesu (3X)
Kuvutuka, yo lunga ve.

Ata mono mosi (3X)
Ee, mono ta landa
Kuvutuka, yo lunga ve.

Ata mpasi ikele (3x)
Mo' ta landa kaka
Kuvutuka, yo lunga ve.

Nzambi ta Kuwa Nge

Nzambi ta kuwa nge (3X)
Na zina ya Yesu !

Yandi ta sadisa (3X)
Na zina ya Yesu !

🔊 O Bible Kele Kieleka

O, Bible kele kieleka, kieleka, kieleka,
O, Bible kele kieleka
Yo ke luvunu ve !

O, Bible kele kitoko, kitoko, kitoko,
O, Bible kele kitoko
Mo' zola yo mingi !

🔊 Sosa Ntete

Sosa ntete Kimfumu ya Zulu,
Ye lunungu na Yandi
Bima yonso Yandi ta yika na nge !
Alelu, Aleluya !

Muntu kuzinga ve na madia kaka
Kansi na ndinga Nzambi !
Sosa ntete mambu ya kele mfunu
Alelu, Aleluya !

Vutuka, Afrika, Vutuka !

Vutuka, Afrika! Vutuka !
Vutuka na Nzambi nge me vila
Beto bika bampeve yonso, biteki yonso,
Beto vutuka n'andi ya salaka beto !
Beto vutuka n'andi ya salaka beto !

🔊 Yezaya 53 :6

Beto yonso, beto vandaka
kuyungana bonso mameme,
Konso muntu na nzila na yandi,
Mawa na beto !

Ebuna Mfumu Nzambi tulaka
Mbi na beto yonso na zulu
na ntu na Yandi, Yandi Mesia
Kiese na beto ! (wa-la-la-la !)
Kiese na beto !

Linya ya
Ntangu, ke
songa ordre ti
dates ya
mambu ya
salamaka

Mikanda ya 1 & 2 Bantotila, 2 Bansangu, Yonasi, Ozea ti Amosi ...




Kimpika na Asiria

Kimfumu ya Israele (Nord)

Bamfumu yonso kaka mbi

Kimfumu ya Yuda (Sud)

Bamfumu ndambu mbote, ndambu mbi



Bamvula 930 ti na 722 na ntwaia ya Yesu


Linya ya
Ntangu, ke
songa ordre
ti dates ya
mambu ya
salamaka

Moniteur,
Atasio !
Mukanda ya
Ecodim ke landa
mukanda yai—
“Bamvula 70 na
Babilone”



Mikanda ya 2 Bantotila, 2 Bansangu

ti baprofete Yezaya, Yermia, Nahumi, Sofonia, Habakuki, Mishe, Mawa . . .

Israele me kwenda na kimpika. Kimfumu kele diaka va.



Bilumbu ya nsuka ya Kimfumu ya Yuda



Merci na freebibleimages.org/Sweet Publishing
ti na Richard Gunther sambu na Bafoto.

Bamvula 722 tii na 586 na ntwala ya Yesu